

東  
華  
續  
錄

東華續錄

乾隆一百九

臣王先謙敬編

臣周潤蕃恭校

乾隆五十四年己酉春正月庚申諭徐嗣曾此次前赴臺灣整頓地方懲治奸匪俱能認真嚴辦盡心經理甚屬出力可嘉雖該撫於逆匪滋事及臺灣從前吏治廢弛之處失於覺察咎有難辭但究係歷任督撫積玩所致非徐嗣曾一人之過見在臺灣地方甯謐徐嗣曾已內渡回任著加恩賞戴花翎該撫惟當益加勤勉將地方應辦事宜悉心妥辦以副恩眷○諭軍機大臣等據成德奏率領官兵自第哩朗古覓取小路進發收復宗喀濟隴卽取道克復聶拉木等語所辦甚是見在鄂輝已領兵將到而巴忠又訪聞賊眾力窮不耐寒冷大兵一到定可卽日成功鄂輝成德巴忠著

每人賞給大荷包一對小荷包二對以示優獎伊等倍當奮勉出力以期速爲竣事至藏內用過糧石務卽給還價值以後隨時支用卽如數陸續給價斷不可稍有遲延致伊等又滋疑慮再巴勒布商頭哈瑚前因形迹可疑拏獲監禁如果有潛通信息之事置之不辦不足示懲著鄂輝等於事竣後明諭哈瑚此事本應將爾卽行正法姑念外番無知大皇帝格外從寬不加深究將爾送至內地安插一面卽行派員護解至京其紅帽薩嘉呼圖克圖於巴勒布之事先行構釁後復議和自不免有侵奪黃教之意但紅教相沿已久傳習亦眾未便遽行更張著傳諭巴忠止須密爲留心防範藏眾漸歸紅教不可稍露聲色俾各相安無事○孫士毅奏安南國王黎維祁感激 皇上再造鴻恩情願親身叩謝臣以該國初定黎維祁未便卽行令於五十五年春閒叩祝 萬壽先令

其子弟來京瞻覲又土目黃文桐見已一心歸順臣專弁持檄前赴宣光一路與烏大經商酌辦理諭軍機大臣等前經有旨以安南新造止須令其親子弟來京謝恩俟朕入旬萬壽屆期再令黎維祁親來瞻覲今孫士毅所奏與朕相同所辦甚好至富綱等前已奏稱黃文桐業將宣光等處收復聽候該國王派員前往接管孫士毅自不必復生疑慮況見已奏凱班師更可毋庸計較著傳諭孫士毅卽遵照節次所降諭旨振旅撤回並一面知會烏大經將所帶官兵同時並撤毋致稽延時日○辛酉諭軍機大臣等成德奏訪察仲巴呼圖克圖等遣人議和但以大兵威嚇並無異詞求解等語朕思伊等議和卽無異詞求解但賊已屢次敗北薩嘉呼圖克圖等探知內地大兵將至陽託議和之名實已送信與賊俾得及早躲避已屬顯然設不遣人前赴賊營賊匪無從得信大

兵一至定可痛加剿戮使之喪膽完事豈不更易著巴忠等將此存記俟事竣之日面前薩嘉呼圖克圖及仲巴呼圖克圖爾等遣人與巴勒布議和雖託詞以大兵恐嚇其實借此送信使該番等聞風遠遁今事已完竣姑不深究爾等務當感激大皇帝寬宥鴻慈嗣後凡事俱聽命而行不可仍前任意致干咎戾伊等如何登答並著據實奏聞○丁卯諭固倫十公主下嫁喜慶禮儀著於今冬舉行所有一切應辦事宜著交各衙門察例具奏○己巳駐藏大臣巴忠奏遵旨至扎什倫布將三處第巴逐加研訊惟聶拉木第巴桑幹私增稅課致釀事端應照唐古特例應斬之犯深透刺字發往煙瘴桑蓋囚種地方其濟隴宗喀第巴賊至不能堵禦擬解至前藏枷號一箇月滿日重責再發唐古特近邊地方充當苦差諭軍機大臣等據巴忠奏審明聶拉木第巴桑幹私添稅課以

致激起事端甚屬可惡其濟龍宗喀第巴雖無情弊而賊至潰逃  
各失所守俱當嚴行治罪著卽照巴忠所擬分別辦理以昭炯戒  
巴勒布人眾在藏往來貿易由來已久一切稅務自有成規第巴  
等何得濫行增額且巴勒布於去歲呈請進表納貢卽因添稅一  
事噶布倫等平日受第巴賄賂恐該番等赴京控告有心袒護妄  
以表文傲慢爲詞寢而不奏此事若置之不辦將來復何所底止  
著傳諭鄂輝成德巴忠傳集唐古特人等明白曉諭使知該第巴  
等罪在不赦故爾加以嚴懲朕辦理庶務一秉大公卽邊遠之區  
功罪惟視其人之自取也鄂輝等見已在第哩則古會合集兵此  
旨到時恐該處天氣融和冰雪已化著卽遵照節次諭旨妥爲辦  
理以冀迅速蒞功○癸酉諭禮部尙書德保因元旦朝賀官員行  
禮越上甬道未能先事督飭是以革去翎頂但念其宣力年久茲

間溢逝著加恩賞還翎頂其禮部尙書員缺著常青補授至禮部  
侍郎有襄理科場及學政各事宜鐵保學問較之達椿爲優著補  
授禮部侍郎其內閣學士兼禮部侍郎員缺卽著達椿調補○諭  
孫士毅奏大兵搶渡富良江時水師參將許廷進及都司富桑阿  
盧文魁千總王成傑把總張振祥五員或則搶奪過江或則在岸  
殺賊實屬奮勇向前又副將德克精額遊擊王檀防守後路不避  
瘴癘督率弁兵往來嚴密搜查署廣東羅定州嚴守田廣西佐雜  
高廷樞王方維隨在軍營代辦一切緊要事件均能加倍奮勉土  
田州岑宜棟帶領土兵赴高平牧馬一路進剿以分賊勢將該國  
太原一路全行肅清尙屬出力以上文武共十員土知州一員可  
否分別賞戴花翎藍翎等語著照所請德克精額許廷進王檀嚴  
守田岑宜棟俱著賞戴花翎富桑阿盧文魁王成傑張廷祥高廷

樞王方維俱著賞戴藍翎嚴守田高廷樞並先賞給升銜頂帶俟  
軍務完竣該督出具考語給咨送部引見又奏官兵在市球江與  
賊匪打仗時有副將慶成家人麻圖見慶成奮勇殺賊其時槍礮  
如雨麻圖恐傷及慶成直前迎敵爲礮子所中洞穿胸背而出日  
來漸能起坐飲食可否量加恩賞等語麻圖並著照臺灣軍營普  
爾普家人馬畝什之例作爲另戶仍賞給護軍藍翎長以示獎勵  
又據孫士毅奏懇辭公爵及紅寶石帽頂並許世亨奏懇辭子爵  
等摺此次孫士毅許世亨帶兵出關能遵照朕節次指示奮勇殺  
賊未及一月卽收復黎城仍立黎維祁爲國王並送回眷屬於字  
小存亡之體已爲盡善盡美卽屬孫士毅許世亨之功是以於奏  
到時卽加恩將孫士毅晉封公爵賞給紅寶石帽頂許世亨賞給  
子爵該督尙奏請俟安設糧臺諸務就緒卽帶兵直搗賊巢朕以



黎城距廣南道路險遠需用人夫眾多恐於安南新造小邦轉多未便是以諭令撤兵由於朕旨並非孫士毅許世亨之畏難中止其收復黎城辦理安速自不可不加懋賞以示酬庸朕於賞功罰罪務歸至當從不稍存畸重畸輕之見致恩賞稍有冒濫此事會降旨以孫士毅若能擣穴擒渠當照阿桂福康安之例再格外加恩特昭寵異今阮惠既未就擒是以不復加賞其公爵與紅寶石帽頂孫士毅自當承受不必辭繳孫士毅既毋庸再辭所有許世亨奏辭子爵之處亦著不必又孫士毅奏黎維祁咨請代奏本年三月先令伊弟黎維祇赴京代謝天恩俟國事稍定懇於五十五年恩准進京叩祝萬壽並瞻仰天顏等語著孫士毅傳諭該國王務宜振作自強力禦外侮將國事加意整頓酌量可以放心遠涉卽於五十五年准其來京恭祝萬壽以遂其瞻仰感戴之誠將此

通諭中外知之○諭軍機大臣等前會屢降諭旨以黎維祁復國後不能振作有爲即使天朝將阮惠等盡爲驅除將來保無更有阮惠其人者復出滋亂豈能屢煩天朝兵力爲屬國拔緝遁逃且黎維祁懦弱無用左右又無一二有能爲之人爲之輔佐或是天厭黎氏朕辦理庶務惟知順天而行是以諭令孫士毅將黎維祁妥爲安頓卽行撤兵回省今據孫士毅奏黎維祁優柔寡斷勢難久支從前爲鄭氏輔政用事之人又希冀鄭氏重興若輩復得任意操縱竊取國柄俟隙而動看來竟是天厭其德果不出朕所料卽此時將阮惠等盡行擒獲恐亦無用如此之人亦何能爲護助止可聽之孫士毅見與烏大經會合一處著卽定期同時撤兵各回本省至前已有旨令伊弟黎維祇先行進京謝恩黎維祁將國事妥爲整飭於五十五年再行來京瞻覲此旨孫士毅見在自當

接奉但相距尙有年餘如屆期該國已經甯謐不慮外侮侵陵自當進京祝嘏以遂其瞻就之忱但黎維祁如此無用國事難期整頓將來能來與否此時亦難豫定也○甲戌賜暹羅國王鄭華敕諭曰朕惟自古帝王功隆丕冒典重懷柔凡航海梯山重譯而至者無不悉歸涵宥咸被恩膏爾暹羅國王鄭華遠處海隅因受封藩職遣使帕使滑里遜通亞排那赤突等恭齋方物謝恩入貢具昭忱悃良可寔嘉朕復念爾與緬甸接壤毗連從前情駁贅角牙相繼爲暴侵陵爾國興師構怨匪爾之由今緬甸孟隕新掌國事悔罪抒誠籲求內附已於該使臣回國時諭令孟隕與爾國睦鄰修好毋尋干戈爾國亦宜盡釋前嫌永消兵釁彼此和好以期息事甯人同作藩封共承恩眷茲特賜國王綵幣等物尙其祇受嘉命倍篤忠忱仰副眷懷長膺寵錫欽哉○丁丑命禮部尙書常青

議政處行走○壬午諭軍機大臣等據鄂輝等奏從通拉山後可  
通宗喀小路進攻見在已到公達山根卽日前抵宗喀並以次收  
復濟龍聶拉木地方等語巴勒布賊眾力窮兼畏大兵勦戮豈能  
肆其煙臂此事自易完結又據奏巴勒布等起釁根由實由唐古  
特等揀擇銀錢加增稅額並於售賣鹽斤內攙和沙土種種積怨  
及遣人講論又復置若罔聞巴勒布心懷不平無可雪憤以致興  
兵果不出朕之所料此事皆由噶布倫索諾木旺扎勒及第巴桑  
幹二人起釁鄂輝等將宗喀濟龍聶拉木收復後卽傳喚該頭目  
到營遵照前降諭旨明白曉諭務使感畏交深永遠不敢侵犯邊  
界誠心立誓方可撤兵至見在會否與賊打仗及將各地方全行  
克復之處並著迅速奏聞○孫士毅奏黎城收復後其迤南一帶  
仍與賊境毗連本年正月初二日據黎維祁告知該國王所派防

守官兵俱被賊人趕逐聲言欲報仇洩恨臣等隨派官兵前進剿殺連敗賊兵詎黎維祁聞阮惠親至心膽俱裂手抱幼孩隨同伊母逃過富良江眾情慌亂國民紛紛逃竄臣與提督許世亨復督率官兵決一血戰無如賊眾甚多將大兵四面密圍臣與提督許世亨不復見面臣奪圍而出前至浮橋令總兵李化龍過江占住北岸詎李化龍行至橋心失足落水臣令副將慶成等回頭施放鳥槍帶兵徐徐由浮橋撤至北岸回至市球江駐紮一面令人趕赴諒山南關一帶訪查黎維祁母子習令進關存活臣膺茲重任不能及早戴功茲復被賊匪截擾請革職從重治罪以爲調度乖方者戒諭軍機大臣等朕前以黎維祁異懷無能毫無振作看來竟是天厭黎氏不能護助而安南民情又反覆難信早經節降諭旨令孫士毅作速撤兵若孫士毅接奉前旨卽遵照撤回計此時

官兵早已進關今阮惠復敢前來截擾究由孫士毅希冀阮惠等悔罪投出以臻全美略耽時日所致見在已交督令該國向多陰雨瘴氣卽欲整兵大舉亦非其時况廣東廣西續調兵夫皆已停止若又紛紛檄調不但緩不濟急而且未免驚駭聽聞總以完師撤回善全國體爲要孫士毅爲軍營總統之人萬不可稍爲冒險該督奪圍而出所見甚是其次則許世亨係提督大員並關緊要見無信息深爲廛念伊二人務宜加意慎重率領官兵安速進關見據孫永清奏黎維祁已於正月初七日投進關內暫送南甯安頓從來行軍之際原不能一往順利卽如新疆西路及兩金川等處亦皆小有挫失旋卽成功此次孫士毅帶兵前赴安南勦賊成功太易今有此波折安知非阮惠自取夷滅此時必須孫士毅許世亨帶領大兵完全而出無損國體將來辦與不辦操縱在我自

可徐爲酌定至孫士毅奏請革職治罪之處此事係出自意外非該督冒昧之罪何出此言該督惟當倍加鎮定料理撤師事宜不必心忙意亂此爲最要料阮惠等亦不敢竟至天朝邊界但關隘一帶亦須安頓兵力以壯聲勢而資接應見據孫永清奏調兵一千餘名前往合之原有防兵共三千名俾資添撥等語著傳諭孫永清再加酌量如續調兵丁尙不敷派撥卽於附近各營一面再爲抽調一面奏聞至粵西官兵見已撤出則雲南一路亦應由宣光安邊等處迅速撤回滇省各營兵額較多若富綱烏大經見帶各兵不敷撥用亦不妨再爲酌調於沿邊一帶安設於聲勢益加壯盛○癸未諭孫士毅奏正月初二日黎維祁到營稟稱聞阮惠有糾眾前來搶奪黎城之信孫士毅與許世亨等分兵前進初三日卽遇見賊眾連次奮力勦殺賊匪敗退詎黎維祁聞阮賊親至

卽攜眷潛逃以致該國百姓慌張逃竄賊勢散而復聚孫士毅因  
黎維祁業經先逃黎城難以久駐應行撤兵卽帶兵先至市球江  
搶占北岸以待大兵之撤總兵李化龍行至橋心失足落水淹斃  
浮橋隨斷提督許世亨總兵張朝龍尙維昇參將楊興龍王宣英  
林遊擊明柱在市球江以南追殺賊眾未及過橋見無信息自係  
身歿見查點入關兵丁已有三千數百名餘尙陸續前來其未出  
官兵俟確查續奏黎維祁與伊母並伊子俱投到鎮南關內送至  
南甯安頓並據富綱烏大經奏滇省官兵已前後全行撤出各等  
語此事前據孫士毅奏安南國內因土酋阮惠等稱兵構亂黎維  
祁爲其所逐藏匿民間竟無尺土之階眷屬顛沛流離敏關籲救  
朕因安南臣服天朝百有餘年最爲恭順乃猝被強臣篡奪其母  
妻親來控訴若竟置之不辦殊非天朝字小存亡之道是以卽令



將伊眷屬收留安頓並令總督孫士毅馳赴廣西就近籌辦節據  
孫士毅奏檄諭安南各鎮目及廠民人等無不聞風響應願效前  
驅該督復力肩重任自請統兵出關朕以所見甚正是以降旨允  
行該督與提督許世亨出關後屢奏克捷痛殲賊眾未及一月卽  
能收復黎城仍封黎維祁爲國王成功實爲安速朕以孫士毅辦  
理此事爲天朝字小存亡體統所關厥功甚鉅且漢大臣中有此  
全才能爲國家帶兵宣力者自應特沛殊恩俾得共膺異數用昭  
獎勵是以於奏到時卽降旨將孫士毅晉封公爵並賞給紅寶石  
帽頂許世亨亦晉封子爵以示酬庸復念安南向有瘴癘且兵夫  
人數眾多若在彼久駐轉於新造小邦多有不便况安南雖蕞爾  
一隅然黎氏立國已久其興廢亦未必不關乎氣數黎維祁似此  
巽懦無能毫無振作看來或者天厭黎氏不加護佑朕從來辦事

無不順天而行是以節經降旨令孫士毅作速撤兵若孫士毅接奉前旨迅卽撤回計此時早已進關乃在被耽延一月有餘致賊眾乘閒復發由孫士毅希冀阮惠等投出或被旁人縛送未免意存貪功因有此意外之變朕與孫士毅均不能辭咎况阮惠既經逃回復率眾前至黎城滋擾必非旦夕所能糾集且其中亦未必盡係賊黨自係附近黎城反側之徒見賊匪潛至從而附和遂至蟻聚蜂屯孫士毅在彼何不留心偵察豫爲布置乃待賊至始行迎堵橋座又復中斷致損官兵究係孫士毅成功後不無自滿之心稍存大意有此挫折但覈其情節與有心貽誤者不同惟因貪功自滿致亡提鎮大員不特難膺懋賞卽令其仍留兩廣總督之任威望已損亦不足彈壓海疆且轉非保全該督之道朕於臣工功過無不權衡悉當其收復黎城之際辦理妥速卽沛恩綸雖該

督具摺力辭亦未允准今該督既有此失未便尙邀恩資仍任封圻所有孫士毅前封公爵及所賞紅寶石帽頂俱著撤回並著來京另用兩廣總督員缺已另降旨將福康安調補福康安接奉此旨卽著星馳前赴鎮南關任事福康安未到任之先仍著孫士毅暫行署篆在鎮南關駐紮俟福康安到彼交代再起程來京至許世亨子爵雖與孫士毅同時並賞但該提督業經身歿究爲可憫且撤兵事宜應聽孫士毅調度與許世亨無涉其子爵著加恩准令伊子承襲總兵尙維昇張朝龍參將楊興龍王宜英林遊擊明柱因橋斷不能過江殺賊陣亡俱著從優議卹總兵李化龍雖因失足落水淹斃實屬歿於王事亦著照陣亡例議卹至此事皆由孫士毅貪功久駐不能遵照諭旨作速撤回以致變生意外提鎮大員亦因橋梁斷壞不能撤出遂致身殞但阮惠以安南土酋逐

主亂常經天兵致討屢次敗逃之後尙敢糾眾潛擾傷及官兵實屬罪大惡極見交春令該處係瘴癘之區未便卽行深入問罪著沿邊各督撫將各營兵弁及時操演務使簡足兵精聽候調遣以備聲罪致討將此通諭知之○諭孫士毅見著來京另候簡用福康安著調補兩廣總督伍拉納於上年甫經升任巡撫雖資格尙淺但在閩年久於該處情形較爲熟悉閩浙總督員缺卽著伍拉納補授梁肯堂著補授河南巡撫其直隸布政使員缺著秦承恩調補王懿德著補授陝西布政使所遺雲南按察使員缺著賀長庚補授○諭軍機大臣等此次阮惠復來滋擾黎維祁聞信先逃該國民心慌亂勢甚鴟張官兵致被擱截提鎮將弁多有損失本係事起倉卒眾寡不敵尙非孫士毅調度乖方所致今將伊公爵及寶石帽頂撤回已足示懲原可仍留總督之任但朕爲孫士毅

思之身爲統兵大員不能豫籌防範又不能遵旨及早撤回官兵以致變生意外提鎮大員多有陣亡威望大損若復畀以封圻必致呼應不靈是以降旨將福康安調補兩廣總督令孫士毅來京另候簡用將來到京後卽以尙書補用孫士毅素稱能事在尙書中尙係出色之員仍可仰承恩眷朕因孫士毅本係文臣未經軍旅從前收復黎城辦理安速會著勞績今雖帶兵退回朕不但不治以失律之罪轉爲憐惜且孫士毅係總統之人非鎮將可比設或稍有疏虞國體攸關更屬難於辦理該國道路險阻如阮惠在富良江市球江等處據險抗拒邀我歸路孫士毅豈能突圍而出幸而阮惠無能官兵雖有挫失尙不至全被擱截此皆 上蒼默佑朕方深爲欽感該督亦當感激天恩不可因事機不順稍涉怨尤惟當倍加鎮靜駐紮鎮南關一帶將撤兵事宜及巡防邊隘等

事辦理周妥俟福康安到彼詳悉告知再行交代來京若孫士毅此時業已自鎮南關起程回粵仍著於接奉此旨後回至該處照料一切斷不可心忙意亂於應辦要務轉不能悉心經理負朕格外矜全之意再孫士毅奏查點撤回官兵已有三千數百名餘俱陸續而來等語隨往黎城官兵共有八千七百餘名除業已進關各兵外其餘陸續到者又有若干名著卽詳查據實覆奏所有新頒安南國敕印是否黎維祁攜帶入關抑或復行遺失之處並著查明覆奏至副將慶成係五福之孫隨在軍營於該處情形自所諳悉今已隨孫士毅撤回著該副將馳驛迅速來京以便將一切情形面加詢問又諭見因孫士毅奏阮惠復糾眾前至黎城滋擾提督許世亨力戰陣亡已降旨令孫士毅來京將福康安調補兩廣總督矣此次安南內訌朕因孫士毅力肩重任自請帶兵出關

致討是以允行該督出關後屢次克捷未及一月卽收復黎城朕以安南人情反覆而黎維祁又巽懦無能節次降旨諭令作速撤兵乃孫士毅意存貪功不卽遵照撤回在彼久駐故有此意外之變阮惠不過安南一土目方今國家全盛若厚集兵力四路會剿亦無難直搗巢穴但該國向多瘴癘與緬甸相同得其地不足守得其民不足臣何必以中國兵馬錢糧糜費於炎荒無用之地是進剿阮惠一事此時非不能辦揆之天時地利人事俱不值辦孫士毅見經挫失威望已損不便仍任總督福康安新經平定臺灣賊匪聲威已著今將伊簡用兩廣總督前赴鎮南關駐紮不特阮惠聞知以孫士毅因失事解任又另派人厯戎行之重臣前往自必爲大舉進剿之計心懷震慄卽內地一帶人民見福康安到彼足資倚仗人心亦可鎮定福康安抵鎮南關後若阮惠等聞風畏

懼到關服罪乞降福康安當大加呵斥不可遽行允准使其誠心畏罪輸服籲請再三方可相機辦理以完此局○甲申諭軍機大臣等此時阮惠等自知傷損官兵獲罪甚大懼天朝大舉進剿自必差人至關悔罪乞降福康安孫士毅俱係封疆大臣仍宜示以嚴厲若差人再四籲懇情詞恭順俟奏到時朕自當相機而行方今國家全盛阮惠以安南土目若集兵會勦原不難爲擄穴擒渠之計但該處向多瘴癘即使收入版圖照新疆之例又須分派多員駐紮而該處貢賦所入必不敷經費況安南民情反覆勝國以前郡縣其地者不久仍生變故歷有前車之鑒朕再四思維實不值大辦莫若量寬一綫俾其畏罪輸誠不勞兵力而可以戡事之爲愈福康安等不可不知此意也見在沿關一帶正需大員帶兵彈壓孫士毅萬不可輕離該處若已起程仍卽速回駐紮俟福康



安到彼交代再行來京至此阮惠乘撤兵之時前來滋擾自係  
孫士毅不能慎密豫露撤兵信息將士思歸軍紀未能整肅以致  
阮惠聞而生心伺隙侵擾從來受降如受敵總須時刻留心卽撤  
兵亦應如臨戰陣倍加慎重乃孫士毅疏於防範以致變生意外  
實屬不能辭咎見經朕格外矜全福康安未到之前孫士毅尤當  
小心妥辦一切不可心忙意亂措置稍有失宜也○諭黎維祁本  
係無能之人屢經播越失守藩封今已敕封爲國王又復棄國逃  
遁律以內地官常亦應斥革治罪將來卽欲懇請瞻覲亦不值准  
其來京止可等諸編氓予以衣食之資俾足存活且南甯距邊關  
甚近恐日久又有夷人往來與黎維祁潛通信息或致滋生事端  
不若將黎維祁及其母子從人等移至桂林省城安插該撫就近  
約束照料較爲妥協著傳諭孫永清卽於省城內查撥空閒官房

一處給與黎維祁挈眷居住並酌量給與口糧安頓以資養贍○

丙戌 御製書安南始末事記曰春日齋居敬觀 皇祖御書心

經張照等跋錄 御製戒之在得之諭憬然有悟因憶安南始末

事爲之記曰我 皇祖戒之在得之訓孫臣固建堂於避暑山莊

其義其事已見之前後之記矣昨歲夏居山莊因有緬甸歸順之

事不無爲之喜無何而有孫士毅復黎城封黎王之奏則又不無

爲之喜夫喜者懼之對也懼則若有所失喜則無所更慮若有所

失心不敢放無所更慮心或放乎緬甸歸順無過宴賚山莊事則

已矣安南之事雖云復其城封其王而其兇首未擒弗屑費中國

之力爲藩國埽蕩擒渠因降旨班師使孫士毅速遵旨班師卽逆

兇復擾黎城則固外藩之事變亂無常亦不屑每問之乃孫士毅

駐彼逾月以待或有所擒獻而又未曾謹設防以致逆兇席捲而

來我師倉卒與戰遂有所失而提鎮三臣同以致命幸而孫士毅全師以歸尙不至有傷國體然而赫濯威重實不無少損焉夫興滅繼絕弗利其土地臣民此非欲得也然而得其名與得其實同之安南之事予果無得名之意乎喜而忘懼謂之能戒可乎故予不咎孫士毅之貪功久駐失防致損威重而自咎予之未能體皇祖訓戒之在茲書以誌過抑亦慎守此志於永久弗替云爾○丁亥諭孫士毅奏接奉撤兵諭旨自恨不能仰體速撤知進而不  
知退遭此損失求重治其罪見查點入關官兵已有五千數百名聞尙有從他處回至內地者至軍營未出各員除前次陳報外又查有副將邢敦行遊擊張純王檀張會元劉越都司鄧永亮守備黎致明七員陣亡又有臺員知縣袁天達府經歷張誠二員似已遇害其餘文員俱已進關等語此事朕屢經早降諭旨令孫士毅

於克復黎城後卽酌量情形撤回入關不可知進而不知退並以安南地方雖小但黎氏立國已久其興廢未必不關乎氣運該國近來構亂頻仍黎維祁復怯懦無能看來或因天厭黎氏朕辦理庶務無不順天而行是以復諭令孫士毅作速撤兵今因官兵在黎城耽延稍久有此挫失可見朕先幾所動事變卽相應而來是此事之失究由於知進而不知退我君臣俱不能不引以爲過但朕先經籌及屢次諭令孫士毅作速撤兵若該督遵照速撤早已入關乃於克復黎城後復在彼耽延一月有餘希冀阮惠悔罪投出或被賊黨縛獻又不豫爲偵察以致賊匪乘閒糾眾滋擾傷及官兵是孫士毅不無貪功自滿卽難辭咎朕因其實非有心貽誤不忍遽加嚴譴然亦不得不治以應得之罪是以將所封公爵及紅寶石帽頂撤回仍令來京另候簡用此時關隘一帶正需大員

帶兵彈壓孫士毅在鎮南關駐紮並續調粵東官兵三千名前往聽候派撥所辦甚是見據孫士毅奏請從重治罪恐伊以待罪之人不敢戴用翎頂先自摘去殊有關繫福康安到彼尙需時日目下該處一切事宜正資孫士毅督率調度若無翎頂不特觀瞻有礙呼應不靈且伊回京後尙可以尙書補用品級相等但伊既有此失若復戴所賞雙眼花翎於心亦難自安孫士毅著仍留總督頂帶並著戴單眼花翎在鎮南關辦事俟福康安抵彼交代後聽候諭旨再行起程來京至未出鎮將各員前已有旨分別議卹所有此次查出之陣亡副將邢敦行遊擊張純王檀張會元劉越都司鄧永亮守備黎致明及被害之臺員知縣袁天遠府經歷張誠均著一併交部從優議卹其餘未出各官兵仍著該督遵照前旨確查咨部分別賞卹將此再行通諭知之○諭軍機大臣等阮惠

等屯聚諒山自係懼我官兵進剿不敢遽回廣南但關隘一帶與  
安南境界毗連內地民人見屯聚附近處所不無驚疑孫士毅見  
調粵兵三千到鎮南駐紮防守以壯聲威所辦尙是至撤回各兵  
見據奏進鎮南關者已有五千數百名聞尙有從他處回至內地  
者等語見在陸續進關及從他道退回者又有若干著卽查明據  
實覆奏此等兵丁皆係不得已退回入關後毋庸再治其罪士目  
潘啓德前次爲逆匪勾引附阮抗拒不從且跟隨官兵進剿殊爲  
出力可嘉見在曾否同官兵一體入關此外似潘啓德之出力者  
尙有何人又黎氏舊臣如阮輝宿阮廷林黎侗等見在何處曾否  
一併隨同入關並著查明具奏前曾有旨諭令福康安迅速馳赴  
鎮南關駐紮福康安抵關後務宜遵照前降諭旨妥協辦理不必  
急於回粵東總俟冬令酌量情形再定行止孫士毅前亦有旨令

其幫同福康安將應辦事宜酌籌妥協後再行來京福康安到彼後如無須孫士毅幫同辦理自當卽令其進京否則將伊多留數月亦無不可孫士毅於該處情形較爲熟悉且卽欲將伊補用尙書見在亦無員缺不妨在彼多住數月俟諸事妥畢後再行來京亦未爲遲○李慶棻卒以郭世勳爲貴州巡撫馮光熊爲湖南布政使

由山東按察使遷

二月戊子朔召明祿來京以蔣兆奎爲山西按察使

由河東鹽運使遷

○

以甘定進爲山東按察使

由濟東泰武臨道遷

○庚寅諭今年京察屆期吏

部開列在京部院三品以上大臣奏請甄別一本向來大學士例

不開列第念大學士阿桂等或襄綸扉或兼統部務均能懋著

勤勞敬公稱職宜加優敘以昭恩典阿桂嵇璜和珅王杰俱著交

部議敘尙書董誥彭元瑞胡季堂福長安金蘭侍郎伊齡阿穆精

阿德成巴忠夙夜宣勤均能稱職宜加優獎俱著交部議敘其內閣學士謝墉吳玉綸盛京刑部侍郎榮柱聲名平常均著交部議處理藩院侍郎福祿年力就衰難以供職著予原品休致餘著照舊供職○孫士毅等奏正月二十二日有諒山夷目遣通事齎送表文前來據稱阮惠情願投誠納貢恐天朝不准是以先令通事齎表送看臣等以阮惠不將內地官兵先行送出遽請奉表稱藩明係借此嘗試當將表文擲還仍行嚴守關隘諭軍機大臣等阮惠以安南土酋想斷不敢侵犯天朝邊界但既借此以爲嘗試若僅將其表文擲還恐尙不足使之震懼畏懾以堅其悔罪投誠之念計福康安接奉前旨自己迅速起程星赴鎮南關接辦一切福康安久歷戎行又甫經平定臺灣賊匪聲威已著著福康安卽檄諭阮惠以前任兩廣孫總督本屬文臣未嫻軍旅是以帶兵出關



不察虛實誤聽爾處人言以阮惠黨羽盡回巢穴駐紮黎城並不留心偵探防範以致墮爾奸計大皇帝因孫總督辦理不善令其解任回京兩廣總督員缺將本部堂補授本部堂歷經出師金川等處並平定回匪簡任陝甘總督前年臺灣賊匪滋事本部堂奉命渡海勦捕並將賊首賊目全數生擒剋期肅事爾等僻處海隅於本部堂出師金川等處或未聞知至臺灣與安南海道可通豈本部堂平定臺灣賊匪爾等亦無所聞阮惠與從前黎氏構釁稱兵自因黎氏勢難並立蠻觸相爭天朝尙可不加深究迨孫總督帶兵出關爾等尙敢糾眾抗拒復潛出滋擾傷我官兵並提鎮大員亦有損失是竟得罪天朝在所難赦今阮惠自知罪大差人敏關悔罪乞降並不將未出官兵先行送出且傷我官兵罪已難恕至提鎮大員被爾戕害其罪更重若不將下手戕害提鎮之人縛

獻軍前正法示眾豈能赦宥阮惠如必欲乞降須將官兵先行送出並將戕害提鎮之人縛獻如此本部堂或可代爲奏聞懇求大皇帝恩寬一綫茲阮惠止係差人進表並不將未出官兵及傷損提鎮之人及早送還獻出明係借此嘗試本部堂久膺軍旅非係孫總督文人不知軍旅者可比今奉命前來惟知聲罪致討若阮惠不急思悛改尙敢仍前差人嘗試本部堂奏知大皇帝惟有統率大兵四路會剿爲掃穴擒渠之舉天戈所指洗蕩無遺莫貽後悔等語向其嚴切檄諭使阮惠見天朝不肯准其歸順震懾聲威復行敬謹差人送還官兵再四哀求維時福康安再遵照前旨相機請旨辦理再送出各官兵內除兵丁及千把以下各弁仍令其食糧當差外其守備以上各員如不過因大兵已撤被賊截留不能復出尙可令其照舊供職惟不准予以升擢已足示儆若截留

在彼見阮惠時或有畏懼卑屈情事則當立予褫革著福康安於  
送出時遵照查明分別辦理至孫士毅經此挫折後於阮惠差人  
乞降一事尙能將其表文擲還且措詞正大得體看來尙有主見  
不至心忙意亂孫士毅在粵年久熟悉該處情形竟當留於該處  
與福康安商同妥辦俟可以起程時再行來京亦未爲遲福康安  
亦當遵照前旨駐紮鎮南關俟諸務畢後奏明請旨前赴粵東○  
辛卯 上御經筵○以普福爲理藩院侍郎○己亥諭據保甯等  
奏伊犁阿奇木伯克鄂羅木咱卜率領眾回子伯克等籲稱回子  
等自移駐伊犁以來生齒日繁請將已成丁能耕種者俱令耕種  
每年多交糧四千石等語阿奇木伯克鄂羅木咱卜等感激朕恩  
情願將已成丁之回子等令其耕種每歲於應交糧九萬六千石  
外再多交四千石甚屬可嘉著保甯等卽將阿奇木伯克及眾伯

克等查明分別定數於彼處存貯官段內揀取賞給以示獎勵朕  
又念回人收糧每歲不同嗣後豐收之年可照伊等所請交納設  
遇歉收仍照原定額數交納不必加增以昭體恤永著爲例○諭  
格綳額到和闐後卽向眾伯克索取銀錢收受皮張等物塔琦並  
未查出及塔琦赴和闐巡查地方問明格綳額向邁瑪第敏借貸  
錢文屬實亦不具奏直至錦格將格綳額索取銀兩收受皮張紬  
段等物揭報後塔琦始赴和闐又未直捷辦理明係迴護掩飾若  
非派福崧前往審辦此案亦不能水落石出似此奉旨審訊之案  
諸大臣竟敢如此迴護掩飾朕又將何以用人塔琦著革職留在  
葉爾羌效力贖罪塔琦所遺員缺著福崧前往辦理見在西藏無  
甚事件雅滿泰在彼亦屬無用念伊前在庫車喀喇沙爾辦事尙  
無錯誤著加恩賞給二等侍衛前往阿克蘇作爲領隊大臣雅滿

泰係曾經獲罪之人今特格外施恩寬免賞給二等侍衛遣往阿克蘇辦事若不奮勉自贖朕必加重治罪○軍機大臣等議奏新疆領隊大臣格綳額擅借用阿奇木伯克邁瑪第敏普爾錢文銀兩並收受阿奇木伯克阿布都喇瑪綳段及各城進奉馬匹皮張等物又購買皮張短發價值應照貪婪律將格綳額擬以斬決卽在和闐正法示眾阿奇木伯克公邁瑪第敏係辦理和闐回城事務大員乃借給格綳額錢文銀兩應將邁瑪第敏之阿奇木伯克公爵一併革退發往葉爾羌效力贖罪阿奇木伯克阿布都喇瑪代織紬段借給銀錢請卽革職告退守備陳士魁跟隨格綳額赴和闐索債應照福崧所請嚴拏加重治罪筆帖式梅泰迎合格綳額代借錢文請革職枷號半年滿日發往葉爾羌三年後再遣回烏嚕木齊塔琦業經革職應無庸議錦格係同城駐紮之人漫無

覺察應請交部議處達福雖屬失察究由該員具摺送明亮轉奏  
應無庸議格綢額所有物件入官其收受眾伯克進奉物件給原  
人領回之處均應如福崧所奏得旨阿奇木伯克公邁瑪第敏借  
給格綢額銀兩甚多實屬諂媚迎合應照此議革退阿奇木伯克  
並公爵但念伊祖噶岱默特在日甚屬出力著施恩邁瑪第敏僅  
革去阿奇木伯克其公爵仍留與伊本身前往葉爾羌效力贖罪  
餘依議○庚子諭軍機大臣等據巴忠奏探得鄂輝成德等已將  
宗喀收復該處人民妥爲安置後卽以次克復聶拉木濟隴見在  
巴勒布頭目帶領屬下人等迎接似欲有所稟報等語巴勒布原  
係在藏往來貿易久享天朝利益斷不敢無端抗拒茲聞大兵一  
到卽迎接將軍大臣意欲稟明情節聽候剖斷是伊等尙知恭順  
必係將平日受屈之處告知將軍等懇求代爲辦理著傳諭鄂輝

成德巴忠如巴勒布頭目果有訴告被欺情節卽明諭以爾等係屬小番料非無故妄興爭鬪明係藏內噶布倫第巴等平素苛求勒索增收稅課爾等欲抒誠納貢藉以奏聞大皇帝又被噶布倫等謊言阻止因此負屈含冤不能解釋致起兵端大皇帝早已洞鑒隱微一秉大公處置噶布倫索諾木旺扎勒業經身故將伊各台吉職銜停襲第巴桑幹發往煙瘴藏內大臣及其餘噶布倫等一併革職治罪想爾等亦已聞知今深諒爾等起事之由實因逼迫所致且大兵到臨卽謹順乞降是以並不嚴加勦辦爾等此後益當感戴大皇帝鴻恩安分守職若再如此妄行斷難輕恕將此明白曉諭俟定界等事完竣卽將官兵撤回此旨到時儻巴勒布已回本境鄂輝等卽遵照譯寫唐古特字咨文速行發往至第巴索諾木冊靈與賊打仗奮勉出力著加恩賞戴花翎並量與頂帶

侯戴綱缺出卽行補用所有保護脅噶爾之噶布倫扎什端珠布  
第巴尼瑪達爾濟戴綱將結索諾木喇什及小第巴等六十三人  
唐古特兵丁二百十四人雖前已賞給段銀著再加一倍賞賚以  
示獎勵○甲辰諭巴勒布係邊夷小醜無故斷不敢滋生事端今  
據鄂輝等奏查明起釁情節果不出朕之所料伊等此時如已收  
復聶拉木濟隴地方卽當將朕屢次所降諭旨明白宣諭巴勒布  
等知悉令彼設誓定界卽行撤兵但此事雖易完結而藏內諸事  
究無一定章程儻日後復有匪徒侵擾又須再爲經理藏眾亦不  
得長享安全從前補放噶布倫戴綱第巴等缺俱由達賴喇嘛專  
主駐藏大臣竟不與聞見在達賴喇嘛樸實無能不過倚仗一二  
近侍喇嘛辦理一切未免輕聽屬下人等情面不擇賢愚濫行補  
放以致噶布倫索諾木旺扎勒第巴桑幹等肆意妄行釀成邊釁



今新疆回部補放大小伯克俱係駐紮辦事大臣等揀選補放嗣後藏內遇有噶布倫等出缺亦當照回部伯克之例由駐藏大臣揀選請補較爲妥協並著駐藏大臣等平日先將各噶布倫戴綱第巴或優或劣悉心查察分別存記俟缺出擬補時自更得有主見不爲屬下人等欺罔而於偶遇緊要之事差遣亦可期得力至駐藏大臣內或有不公不法情事每年達賴喇嘛班禪額爾德尼遣使呈進丹書克亦可順便將其錯謬之處據實陳奏朕卽重治其罪決不寬恕自平定回部以來派令大臣等前往駐紮辦事三十餘年亦止有素誠高樸格棚額三人任意縱恣經朕查訊得實卽行正法並未稍有姑息眾所共知嗣後駐藏大臣必須秉公辦事斷不可圖利徇私自貽伊戚再藏內地廣人稠界連外番平素雖有弁兵之名而於如何操演如何防守如何給與口糧之處向

未定有條規此次巴勒布忽然滋擾竟至不能抵禦以致調發內地大兵此事甚關緊要嗣後藏內挑取兵丁一二千名每年應於何時操練各隘口如何駐防及邊界地方如何安設臺站務須妥協定議永遠遵行但唐古特等皆以種地牧放爲生宜將藏內各地方氣候寒煥及外番部落相離遠近詳晰查明酌定何處當設兵駐防何時可撤回更換務令該兵丁等生計有益不誤耕種牧放之期而又能實力操防於天時地利兩無貽誤方爲妥善再此項兵丁自須酌給口糧今所以大加整頓者特爲保護達賴喇嘛班禪額爾德尼並全藏地方起見所需各項自應在達賴喇嘛班禪額爾德尼商內均勻支給但伊等商內是否足敷給發亦當悉心籌畫辦理著傳諭巴忠將朕憐憫闔藏人眾代謀久安長治之策詳悉曉諭知之此時舒濂諒已到彼鄂輝成德巴忠等可卽與

舒濂會同妥議俾日後遵循妥協得有主持也○命內閣學士吳玉綸開缺以三品京堂用盛京刑部侍郎榮柱以刑部郎中用仍均帶革職留任○以僧保住爲盛京禮部侍郎由內閣學士選○乙巳諭軍機大臣等佛智奏審訊巴勒布商人哈瑚據稱前年曾將伊頭目所交文書轉呈慶麟等並有懇請照前遣使入貢求爲代奏之語此事亦不出朕所料可見前將慶麟雅滿泰治罪實爲咎所應得外夷輸誠納貢遣使請安自應卽爲陳奏乃慶麟既不識廓爾喀字未能譯出又稱其詞僭妄自相刺謬此皆索諾木旺扎勒任意妄行以致慶麟等爲所愚弄著傳諭鄂輝等遵照前降諭旨將此事向巴勒布頭目確切訪察相機辦理外至索諾木旺扎勒專恣橫行原與眾噶布倫無涉使索諾木旺扎勒尙在自應重治其罪今已倖逃顯戮因將伊子革去噶布倫並停襲扎薩克台吉以

示懲戒但恐眾噶布倫等未能深知妄生疑懼亦未可定鄂輝等  
可將索諾木旺扎勒已故並不責備伊等之處明白曉諭令其無  
庸疑懼嗣後止須勉辦事毋蹈前轍至班第達係休致之人尤  
無關涉也再該處補放噶布倫戴綱第巴及操演兵丁防守要隘  
等事昨已降旨令鄂輝等妥速酌議章程具奏但思從前班第駐  
藏之時辦事甚好原俱定有成規黃教諸人亦皆從順今舒濂普  
福斷不如慶麟等之糊塗廢弛然諸事徑由大臣專辦不稍留達  
賴喇嘛地步似於達賴喇嘛既失體面而於全藏觀瞻亦大有關  
繫著傳諭舒濂普福務將從前班第辦過之事閱看率由舊章若  
達賴喇嘛所言當理即可照彼施行儻揆之於理未甚妥協自不  
可曲意聽從並將達賴喇嘛所言失當之處據實陳奏卽如噶布  
倫戴綱大第巴皆有辦事之責向來出缺俱將伊子補放亦屬相

沿舊習今若盡行更改未免過於偏執若仍照向例俱將伊子補用則又幾似承襲必致所用非人於事無裨嗣後缺出時總視伊子之賢否酌定去取其能辦事者卽予挑補其不能辦事者斷勿徇情至小第巴爲數較多且係分駐各處路途亦遠若必盡由大臣等驗放此輩能否優劣究難周知且令伊等跋涉不免拮据嗣後小第巴缺出卽責成該管之噶布倫戴綱等務令各舉賢能充補想伊等自不敢任情瞻徇而小第巴等亦可免往返之勞著鄂輝成德巴忠舒濂普福將此等事悉心籌度會同妥議並著巴忠於辦理賊匪事竣由脅噶爾同時再行嚴訊慶麟前年巴勒布呈請遣使進表伊豈毫無聞見乃始終隱匿不奏究係何心卽錄確供遇便奏聞○丁未諭軍機大臣等巴勒布夷人侵擾藏地一事皆由噶布倫索諾木旺扎勒肆意妄行苛取商人物件第巴桑幹

擅增稅課等事起釁今雖將索諾木旺扎勒之子及桑幹分別懲處但念達賴喇嘛誠實忠厚遇事無所主持一切俱恃左右喇嘛區處必有狡黠之人在旁任用是以索諾木旺扎勒藉得交通恣橫此輩互相交結若不投之遠方久之仍不免滋生弊端巴忠熟悉該處情形自伊到彼以來有無此等情節自不難一望而知著傳諭巴忠將達賴喇嘛屬下親信喇嘛內密加查察如向日並無與索諾木旺扎勒交通之事則已若有其人巴忠亦不必明言卽向達賴喇嘛告稱此人學問甚好意欲與伊同赴京城在 雍和宮居住儻達賴喇嘛靳而不與或稱西甯果莽等係口外地方何不令往彼處住持教訓該寺喇嘛亦一善事巴忠務以婉言勸導總須將此等喇嘛攜帶同行俾絕後患方爲妥協可否如此辦理仍著巴忠揣度情形據實具奏並著舒濂普福等一體留心○己

西諭軍機大臣等據巴忠奏鄂輝等辦理一切事宜大約三月內便可撤兵口糧足敷支用無庸另籌採買等語所辦甚好此次用兵原爲一經懲創使巴勒布不敢再有侵犯永保衛藏之意但藏內人性愚鄙所有賞給糧價自須傳喚供運鄉民面行曉諭發領方不至有侵漁之弊舒濂此時諒已到藏普福亦不久可至伊等務須親身督辦斷不可交噶布倫第巴等轉給以致從中剋扣俾有向隅巴忠由噶噶爾回藏一切應辦事宜俱明白告知舒濂普福交代停妥仍卽趕至聶拉木一帶會同鄂輝等與巴勒布頭目議定界址並將前此發往諭旨詳晰宣示令其俯首帖服然後將藏內操演兵丁防守要隘及補放噶布倫第巴等事一一酌定章程並於紅教相沿不致溷入黃教之處密爲加意防範巴忠務俟諸事俱臻完善再行回京又諭慶麟抵藏後任意修飾房屋諸事

廢弛又將巴勒布呈進表文聽信索諾木旺扎勒之言隱匿不奏  
是以前降諭旨將慶麟在彼枷號三年但枷號慶麟之意特爲駐  
藏大臣官員示儆非以垂戒唐古特人也打箭鎗爲入藏通衢大  
臣官員俱由該處經過觸目儆心足昭炯戒著將慶麟解赴打箭  
鎗枷號三年不必在藏辦理○以主刑署刑部右侍郎姚綦爲江  
西布政使由廣東按察使遷○辛亥諭福康安奏羅源營遊擊音德布稟  
報據濂澳汛外委張文魁報稱正月初七日夜有賊匪突入營房  
搶去小礮二尊及烏槍腰刀等件張文魁率兵追拏被賊拒捕毆  
傷等情遂派鎮道前往勘驗並訊出正月初七夜汛兵在汛者止  
有章達升林則能陳佳春三名賊匪入寨時林則能陳佳春卽在  
草蓐內藏匿章達升同張文魁已經睡熟致搶去礮位覺查之後  
恐干重罪商同裝點傷痕捏報其烏槍腰刀等項係本來短缺捏



報被搶各情節福康安隨親往勘查訪得濂澳汎於上年九月十六日卽曾失礮二尊通報總兵遊擊在案因尋覓無蹤私將羅源縣火藥局存貯舊礮二尊運往安設捏稱尋獲具報完結該總兵遊擊亦未到汎查驗又緣羅源營守備姚洪聽得虎尾汎失礮二尊該外委吳國珍恐報出干罪起意將濂澳汎之礮竊去抵補隨赴虎尾汎查看屬實遂彼此商量卽將火藥局舊礮擡往換回寢事其虎尾汎失礮至今終無下落因查上年連江營遺失礮位一案見究出兵丁等有偷賣與洋盜情事此案遺失之礮及鳥槍等物安知非弁兵等得贓偷賣必須徹底訊究請將遊擊音德布守備姚洪革職嚴審總兵希當阿就近交軍機大臣訊問等語殊出情理之外海疆重地該管兵弁俱應在汎梭織巡查所貯礮位軍裝軍械等物皆當隨時查點小心看守俾歸實貯乃濂澳汎額兵

五十名止有三名在汎已顯有冒糧包差情弊况賊匪入寨竊礮時該管兵丁非惟不卽追拏轉在草莽之內藏匿迨至遺失後復裝點傷痕捏報其虎尾汎遺失礮位外委吳國珍懼報出干罪私向濂澳汎竊去抵補而守備姚洪查出後又商同將火藥局舊礮擡往換回捏作尋獲稟報該鎮將完結種種狡詐實爲可惡此而不嚴加懲創其何以緝奸匪而飭戎行且上年連江營卽有失礮之案見經福康安究出兵丁等私賣與洋盜情事則濂澳虎尾二汎所失礮械安知非弁兵得贖偷賣尤不可不徹底根究福康安見調兩廣總督所有參奏之遊擊音德布守備姚洪著革職拏問交與伍拉納會同徐嗣曾提集案犯嚴審定擬具奏如有應行斬絞之犯卽著該督等一面奏聞一面派委大員押赴原汎地方傳集弁兵觀看正法俾昭炯戒總兵希當阿於所轄營汎遺失礮位

並不查驗飭緝任聽該備弁抵補寢事亦屬可惡朕因希當阿之父曾經出力陣亡是以加恩調宣化鎮總兵俾其就近養母今見有此欺飾之罪著革職解京交軍機大臣會同刑部審明治罪足見加恩治罪朕惟一秉至公至閔省營伍玩縱廢弛至於此極李侍堯因甫經抵任卽在廈門一帶辦理軍務旋即身故不及整頓總由富勒渾雅德從前在彼因循廢弛漫無查察所致伊二人前已加恩釋放今觀營伍玩誤至此皆彼二人因循玩忽所致若仍任其在家安居復何以示儆富勒渾雅德均著發往伊犁效力贖罪並著自備資斧卽於明日起程前往不准給與驛馬以爲貽誤封疆者戒○以張朝緒爲廣東按察使由河南糧道遷○壬子諭福康安奏接據圖薩布來信知安南阮匪復行糾眾滋擾福康安若俟奉有諭旨始行起程則行走已緩心實不安見已帶印前赴漳泉

一帶順便查閱營伍侯再接粵省信息卽委員將總督印信齎回交徐嗣曾接收卽兼程馳赴粵西等語孫士毅前於黎城退出之後朕以閩粵境壤毗連福康安得有信息必卽當奏請前往早向軍機大臣言及福康安果有此奏不出朕之所料福康安秉性公忠能視國事如家事其才猷識見又能明敏周到如此方不愧爲休戚相關實心任事之大臣朕安得不加之優獎福康安著交部議敘至富勒渾雅德二人其年較福康安爲長經朕加恩擢用歷任督撫亦久於福康安乃其識見不特不能如福康安之周到且一味因循玩誤毫無整頓前年因柴大紀一案拏交刑部治罪本應卽正典刑經朕加恩釋放原屬格外寬宥見據福康安查奏閩省連江濂澳等汛有遺失礮位並有私將礮位賣與盜船以及裝傷捏報等事此皆由富勒渾雅德前在閩省於地方諸務種種廢

弛所致伊二人貽誤封疆至此若仍任其得以在家安居朕又將何以用人昨已降諭旨將富勒渾雅德發往伊犁效力贖罪並不准給與驛馬令其自備資斧卽於次日起程前往以示懲儆各省督撫養廉豐厚平時因循懈玩全不以事爲事甚或任意妄爲者亦在所不免止因命運好未經發覺得以安然無事儻一經敗露朕必從嚴辦理不能稍爲寬貸卽如富勒渾雅德二人雖經釋放於前今因其在閩種種貽誤廢弛立卽發往伊犁朕於諸臣功罪一秉大公惟視其人之自取該督撫等受朕厚恩皆宜以富勒渾雅德二人爲前車之鑒此旨著各省督撫入於交代冊俾各屬目儆心實力任事並著將福康安奏摺發交各省督撫閱看伊等試思同任封圻何以不能如福康安之視國事如家事庶其各知愧勵勉副委任毋負朕諄諄訓誡至意將此通諭知之○癸丑雲貴

總督富綱等奏安南土目黃文桐見尙駐守宣光其麻允敏等俱各回自守查馬白之外卽係黃文桐所駐都竜之地該土目家在近邊情殷內顧或不敢遽爾反覆批亦不必問矣又奏旬日以來有廣西軍營兵弁因迷路誤入滇境臣逐一訊明籍貫營分遣令回粵諭軍機大臣等前此官兵由富良江等處撤回阮惠如果有心攔截則粵西迷失弁兵豈能繞道至滇是阮惠雖至黎城滋擾於官兵尙不敢肆行傷害但不知此項官兵赴滇時係由何路行走所過該處夷人情形若何如尙未遣令回粵著富綱向其詳細詢問令該弁兵等據實說出勿稍隱飾迅速奏聞如已回粵卽著福康安孫士毅等詳詢具奏其邊外土目人等從前因力不能敵本多附阮繼見大兵出關始行效順將來有無變更亦可不必問至粵西官兵前據孫士毅等奏進關者已有五千餘名此摺係二

月初十日奏到迄今已及兩旬會否又有續出官兵著福康安孫士毅等卽行詳晰查詢據實具奏至粵省迷失官兵阮惠不敢攔截加害得繞至滇省進口看此情形尙知畏懼斷不能復至邊境滋事所有滇省馬白等關隘止須照舊時應駐兵數安設巡防飭令加意查察其前調協防之兵應遵照昨降諭旨陸續減撤不必安設多兵卽粵西鎮南關一帶亦當俟阮惠敬謹差人到關籲懇再行相機籌辦○甲寅調蘭第錫爲江南河道總督李奉翰爲河東河道總督○福康安奏請於沿海地方明設官渡給照驗放以清私渡之源從之○乙卯孫士毅奏二月初九日阮惠又遣夷目阮有明武輝璞二員齎表呈進臣諭令左江道湯雄業在關前面諭並將表文拆閱情詞尙爲恭順惟以官兵尙未全送出仍令指駁恭候訓示遵行諭軍機大臣等此次阮惠糾眾潛出滋擾致官

兵損失並傷及提鎮大員是竟得罪天朝在所難赦方今國家全盛帑藏充盈原不難統兵進剿見在帶兵大員諳練軍務久歷戎行者亦尙有人帑項見存貯六千餘萬卽費至三千萬亦斷不稍有靳惜且朕辦理庶務惟日孜孜亦非老而畏事惟念安南地方水土惡劣向多瘴癘實不欲以天朝兵馬錢糧徒糜費於炎荒無用之地揆之事理實不值復行大辦但阮惠得罪天朝此時雖遣夷日兩次齎表至關究難遽允所請至官兵等既經陸續退出者甚多其未出官兵自係前在黎城跟隨許世亨張朝龍等打仗勇往深入以致落後被留不能復出其情節尙堪憐憫將來阮惠等將此項官兵續行送出時不但必復治其罪並著加賞一月錢糧令其歸伍甯家以示格外矜恤該兵丁等既係親隨許世亨等打仗之人所有許世亨等實在下落各兵自所深悉著傳諭福康



安等俟將來各兵送出時面詢確切情形再行具奏○諭據鄂輝等奏收復宗喀地方後因連降大雪官兵暫行守候見在覓路速進卽行傳喚該頭目來營大約三月內可以完事藏內辦出糧餉足資接濟等語巴勒布頭目前據奏在交界外地方聽候官兵到彼欲行申訴鄂輝等務宜作速前進酌量雪勢稍薄可以行走之處繞至聶拉木濟龍亟爲收撫卽問明該頭目等起釁情由遵照節次諭旨剴切宣布總在懾服伊等之心使永遠不敢侵犯立定界址卽行撤兵勿致久稽時日也○丁巳以多永武圖敏俱爲內

閣學士

多永武由太常寺卿圖敏由詹事府

三月戊午朔諭軍機大臣等從前大兵出關土田州岑宜棟率領土兵隨同進剿尙爲出力及被賊圍裹遣人將印篆送回冒敵前進打仗陣亡殊堪憐憫該員有子與否著福康安查明具奏再從

優賞卹其所帶土兵係孫士毅何時調往見在何處曾否全數入關並著福康安查明具奏夷官潘啓德拒絕賊黨曾爲大兵嚮導今復挈眷進關其阮庭沛等五人雖不比潘啓德出力但不肯附從賊黨求爲內地民人其情亦屬可憫潘啓德當賞以頂帶酌加錄用阮庭沛等均應酌給口糧妥爲安插毋致失所其未出各員弁內如有實係陣亡者並著福康安確切查明咨部議卹至廠民人等從前偷越出口本係有罪之人前因伊等願效前驅是以免其治罪而大兵勦賊廠民等不過隨眾行走並未見有格外出力之處此時安南之事辦與不辦操縱自我斷無因廠民有情願勦賊之請遽爾輕舉妄動但伊等於官兵出關時既隨同前往而此時又不肯聽從阮惠恐致被其殺害實亦有所不忍應妥爲辦理再此次退回入關兵丁係迫於賊勢眾多情非得已此內有打仗

受傷之人自應酌量加賞昨因在黎城未出官兵自係隨同許世亨深入被賊遮留已經降旨俟該兵丁等送回時仍令歸伍差操再賞給一月錢糧所有孫士毅奏退回官兵應否仍行加賞之處並著福康安查驗情形分別辦理至孫士毅於克復黎城後不卽遵照諭旨迅速撤兵又復疏於防範以致變生意外此過自不能解惟當益加勉勵幫同福康安妥協措置以冀稍贖前愆○庚申諭秦承恩著仍留陝西布政使之任其直隸布政使員缺著馮光熊調補所有湖南布政使員缺卽著王懿德調補再見在甘肅總督藩臬俱係滿員應爲酌量更調所有甘肅按察使員缺著周樽調補其所遺陝西按察使員缺著思明調補至陝西潼商道德明前經降旨令其與廣東雷瓊道宋鎔對調今據勒保奏稱德明親老見在迎養在署且該員有承辦城工尙未完竣等語德明若調

廣東其老親又須同往跋涉爲勞且該員見有經手事件未經完竣德明著仍留潼商道之任宋鎔亦著回甯瓊道原任無庸對調

○以鄭際唐爲內閣學士

補翰林院侍

○癸亥

上親耕藉田○

免甘肅通省逋賦及未完籽種口糧○甲子諭朕閱內左門登載尙書阿哥等師傅入直門單自三十日至初六日所有皇子皇孫之師傅竟全行未到殊出情理之外因召見皇十七子同軍機大臣並劉墉等面加詢問如係阿哥等不到書房以致師傅各自散去則其咎在阿哥自當例加懲責今據皇十七子奏稱阿哥等每日俱到書房師傅們往往有不到者曾經阿哥們面屬其入直伊等連日仍未進內等語皇子等年齒俱長學問已成可無須按日督課至皇孫皇曾孫皇元孫等正在年幼勤學之時豈可稍有閒斷師傅等俱由朕特派之人自應各矢勤慎卽或本衙門有應辦

之事亦當以書房爲重況見在師傅內多係閣學翰林事務清簡並無不能兼顧者何得曠職誤功懈弛若此皇子爲皇孫輩之父叔行與師傅等胥有主賓之誼師傅等如此怠玩不能訓其子姪皇子等卽當正詞勸諭如勸之不聽亦應奏聞乃竟聽伊等任意曠職皇子等亦不能無咎至書房設有總師傅並不專司訓課其責專在稽察與總諳達之於眾諳達等無異師傅內有怠情不到者總師傅自應隨時糾劾方爲無忝厥職今該師傅等竟相率不到至七日之久無一人入書房其過甚大而總師傅復置若罔聞又安用伊等爲耶此而不嚴加懲創又復何以示儆嵇璜年已衰邁王杰兼軍機處行走情尙可原著從寬交部議處劉塘胡高望謝塘吉夢熊茅元銘錢際錢越嚴福程昌期秦承業邵玉清萬承風俱著交部嚴加議處至阿肅達捧身係滿洲且見爲內閣學士

毫無所事其咎更不能辭均著革職仍各責四十板留在上書房效力行走以贖前愆而觀後效○乙丑諭昨因上書房阿哥等師傅自二月三十日至本月初六七日之久無一人入書房殊出情理之外已降旨將總師傅嵇璜王杰交部議處矣劉墉係大學士劉統勳之子朕念伊父宣力年久特加恩擢用其在府道任內頗屬匪免及爲學政卽不肯認真速授湖南巡撫聲名亦屬平常因內用尙書其辦理部務更復一味模稜朕曲賜優容未加譴責伊自當感激朕恩亟思愧奮益矢勤慎今阿哥師傅等不到書房至七日之久劉墉身爲總師傅又非如嵇璜年老王杰兼軍機處行走者可比乃竟亦置若罔聞似此事事辜負溺職於國家則爲不忠於伊父則爲不孝其過甚大豈可復邀寬宥且伊係大員亦不必再俟部議劉墉著降爲侍郎銜仍在總師傅上行走不必復兼

南書房以觀其能愧悔奮勉否所有吏部尙書員缺著彭元瑞調補兵部尙書員缺著孫士毅補授孫士毅未到之前其兵部尙書事務仍著彭元瑞兼署至協辦大學士本係可有可無之缺見在內外漢大臣內一時亦不能得人此時且無庸補放至皇子等年齒俱長學問已成或可無須按日督課皇孫皇曾孫皇元孫等正當年幼勤學之時豈可稍有閒斷師傅等之任意懈弛皆由總師傅不能稽查督飭所致嵇璜年力衰邁王杰兼軍機處南書房行走既不能隨時查察卽不必復兼此虛名總師傅之職著改派阿桂李綬爲總師傅以專責成王懿修見實患病竟無庸交部亦不必在上書房行走著總師傅等另選人品端方學問優長之員帶領引見候朕簡派謝墉在學政任內聲名平常本係獲咎之人前京察議處時經吏部議以革職念其學問尙優是以從寬留任仍

令在上書房效力伊更當知過感奮乃亦復偷安七日不到更屬有乖職守謝墉著降爲編修革職留任不必復在上書房行走著在武英殿修書處效力贖罪其餘各師傅等統俟部議上時再降諭旨○丙寅諭軍機大臣等昨據孫士毅奏阮惠差人將未回官兵先行送出卽日可以到關已有旨諭令福康安檄知阮惠並恐福康安未到之前孫士毅先將表文奏到復諭令將檄諭暫停發往以俟後諭今孫士毅於該夷日到關時令湯雄業諭以孫士毅已奉旨回京福康安卽日可到俟福康安到彼再代爲懇求轉奏尙與昨降諭旨相合至阮惠所進表文措詞恭順尙知畏懼悔罪但伊連次乞降相隔未久自應示以遲難以堅其畏威內附之誠若孫士毅業已允爲轉奏則摺到時卽應降旨今孫士毅係令湯雄業諭以俟福康安到彼再爲懇求代奏是此次回覆該夷目不



過作爲湯雄業之意自爲辦理孫士毅尙未聞知具奏所辦頗是卽其表文亦係孫士毅拆閱副表不值特降諭旨著福康安仍遵照昨旨檄知阮惠以爾本安南土酋乃敢抗拒官兵戕害提鎮大員其罪甚大今雖三次乞降並將未回官兵送出尙未足以贖爾之罪且爾所稱已將抗拒官兵之人正法此言亦不足信本部堂不便代爲具奏如誠心歸附將戕害提鎮之人縛獻本部堂方可代爲轉奏爾若不能遵奉獻出惟有統率大兵分路進剿不將爾等盡數誅夷不止等語卽行向其嚴切檄諭俟阮惠遵檄呈獻福康安再允爲具奏屆時酌量情形再行降旨指示辦理至送出官兵內遊擊張會元歷經出師緬甸金川等地打仗受傷今又因爲賊戕傷倒地不能退出情殊可憫著福康安於該員傷患平復後給咨送部引見守備勞顯亦因受傷被留訊無卑屈情事著准其

回任其餘送出官兵並著福康安遵照前旨分別辦理○丁卯

上啓鑾幸盤山○免經過地方本年額賦十分之三○戊辰諭軍機大臣等福康安此摺係二月十九日行抵潮州拜發計此時自可前抵鎮南關與孫士毅籌辦一切安南之事屢經孫士毅奏阮惠數次敝關乞降已節降諭旨令福康安酌量妥辦福康安到彼時自能遵照辦理但朕於安南一事決計不欲調兵進剿之故不能不詳悉諭知安南聶爾彈丸以天朝全盛之勢調集大兵分路進剿何難立就蕩平前次孫士毅帶兵八千一月之內卽能直抵黎城若命福康安檄調多兵聲罪致討必能立奏膚功但阮惠自量螳臂不能抵禦必仍竄廣南卽使我兵深入窮追直抵廣南而阮惠或竟遁竄入海逃至附近安南之暹羅南掌等國天朝豈有因阮惠一人未獲又加兵他國之理况阮惠雖得罪天朝旋卽屢

次乞降頗知畏懼情詞恭順亦無干犯怙惡之事從前緬甸尙置而不辦阮惠情罪較之緬甸有閒而其水土惡劣又與緬甸相等即使將其全境蕩平郡縣其地內地之人在彼難以久居且該處人情反覆亦難保日久不復滋事是以節降諭旨如阮惠誠心歸順孫士毅見已調兵三千名防守關隘不必再行紛紛徵調福康安想尙未接到前旨故有此奏福康安抵鎮南關後止須遵照前旨嚴行檄諭阮惠見已震懾請降福康安又威望素著之人自必更加畏懼俟可以准其降附時卽當酌量情形奏聞請旨此係朕就見在情形思慮所及遙爲指示如將來情事或有不同之處朕再當隨時訓誨福康安自能遵照妥辦○己巳諭軍機大臣等昨因福康安覆奏接奉諭旨一摺業將決計不欲調兵進剿之故詳悉傳諭矣安南葛爾彈丸天朝若調集大兵分路進剿原無難立

時蕩平但調集大兵深入進討不特勞我師徒而該國人眾罹於鋒鏑中外一體夷民亦皆赤子朕心究有所不忍況從前緬甸將楊重英等擅留彼處尙因其水土惡劣置而不辦安南水土與緬甸相等而阮惠畏懼天朝表文內情詞恭順且稱已將戕害提鎮之人查出正法並將未出官兵全行送回其情事與昔日情駁迥別福康安檄諭阮惠亦須於嚴正之中開以一綫之路當諭以爾等悔罪求降如表文內措詞未能妥協本部堂自當駁回如情詞懇切立言恭順亦必爲爾陳奏候旨遵行天朝體制封疆大吏事無鉅細從不敢壅於上聞爾果有此誠心自可仰邀聖鑒等語如此明白宣諭阮惠等不至絕望必當懇切乞降俟可以允准時福康安酌量情形奏聞候朕再酌量降旨○庚午 上駐蹕盤山○甲戌諭軍機大臣等前次阮惠送出官兵五百餘名據稱尙有未

出二百餘人卽當陸續護送進關茲復送出兵夫三十九人是尙有一百餘人未經送出據稱尙須陸續送回見在曾否又續行送至著福康安等查明具奏然此亦非要事至黎何前次不避險阻尋覓黎維祁護送黎城黎維祁棄城潛逃黎何復因該國印篆係天朝頒賜卽欲赴關呈繳頗知大義旣爲賊眾所追似應略遣弁兵前往接應爲是孫士毅素係曉事之人何以竟見不及此萬一黎何爲賊眾追拏致被戕害豈不可惜據通事陳正忠稟稱黎何帶同吏官數人從後山逃去日內卽可到關等語黎何曾否業已齎印入關抑或尙無實在下落著卽查明具奏黎何困苦艱難始終一節其居心行事殊爲難得朕欲親見其人將來入關後福康安卽當派員將黎何護送進京候朕酌量加恩並曉諭黎何令其安心進京勿致稍生疑畏至籌辦安南之事節次所降諭旨甚明

福康安此時自己前抵鎮南關如何與孫士毅酌量妥辦及阮惠  
曾否又遣人到關籲請之處並著卽行覆奏○丁丑 上回鑒○  
己卯 上還京師○諭軍機大臣等鄂輝等尋覓小路恢復宗喀  
復因該處積雪甚深阻滯不能前往萬一軍糧不濟或兵丁不耐  
寒冷不服水土致多傷損轉屬於事無益聶拉木濟噶二處究係  
偏僻小地無甚緊要理應將兵撤回朕此旨到時若雪已融化鄂  
輝業經前進傳喚巴勒布頭目來營諸事妥辦固屬甚善僅積雪  
未消我兵旣不能前往巴勒布頭目亦不能前來鄂輝等不必固  
執前旨不敢撤兵朕反復思之此時竟以暫行撤回爲是但撤兵  
時須於噶布倫內擇一能事可信者並揀藏內舊有官兵及鄂輝  
等帶有屯練內熟習唐古特話之人各派一名會同前往巴勒布  
地方諭以從前噶布倫索諾木旺扎勒侵漁商人策巴桑幹私行

增稅及爾等投遞呈詞又不代爲陳奏大皇帝已一切鑒知故將  
索諾木旺扎勒桑幹俱分別懲治爾等縱有屈抑亦已伸雪前因  
衛藏並未豫備內地大兵相離較遠致爾等搶掠轟拉木濟噶宗  
喀等處迨奉旨調兵前來又遇雪阻實是爾等微倖萬一今以大  
兵不宜在此久駐暫行撤回爾等若倚恃雪阻於官兵撤回後復  
敢互有侵犯我兵退駐藏內爾等於春夏時滋擾卽行痛加剿戮  
若仍俟冬雪之時藉以抗拒試思爾等旣至藏界歸途豈獨無雪  
我兵當乘勝掩殺絕其後路不令一人生還彼時追悔何及如此  
明白指示令噶布倫等傳知伊等如何登答亦令噶布倫轉行稟  
覆卽可知其誠僞此事亦不必明言諭旨卽作爲將軍大臣之意  
一面遣人前往一面卽將官兵撤回在扎什倫布等候俟噶布倫  
等回時再行撤至前藏但撤回之後或巴勒布再有蠢動亦難保

其必無鄂輝等當與巴忠會議或於此次所調達木兵內及伊等帶往應行換班之兵共揀選一二千名作爲後護仍留在藏不時演習以備不虞更爲周妥著傳諭鄂輝等卽行熟商定議迅速奏聞○辛巳兩廣總督福康安奏臣行至廣西賓縣地方接授督篆一路密察安南動靜並以情事推之黎維祁乘印潛逃竟係一童駭昏豎不足憐惜其國中亦並無愛戴故主者阮惠旣欲號召國人自必仰藉天朝聲勢其畏懼震懾似非虛假惟曾抗我顏行此時未便遽略迹原心臣到關後當於拒絕之中予以轉旋之路總須審慎隄防一有把握卽當馳奏請旨諭軍機大臣等福康安所奏大端已得止可如此辦理福康安於十二日已過南甯計此時早抵鎮南關與孫士毅熟商妥辦俟福康安奏到再當酌量降旨至副將慶成因其隨至軍營是以諭令馳驛來京以備詢問今福



康安於途次遇見該員先向詢問雖據福康安奏該員所述與傳聞之言無甚異同但何不略敘數語奏聞著傳諭福康安卽將抵鎮南關後作何籌辦並慶成所述情形若何之處遇便奏聞

夏四月丁亥朔諭軍機大臣等前因清口屢有倒漾之患經朕特命薩載與督臣高晉親履陶莊測量高下繪圖具奏朕復詳酌情勢以硃筆點記指示開挖引河去清口較舊時已遠五里河道從此安流順軌會清東下五十一年黃水盛漲設非有陶莊引河幾難免河流倒灌之虞可見該處引河甚爲得力見在已屆春汛何裕城回任後書麟自己起程回至清江料理防汛事宜蘭第錫亦早經到任所有陶莊引河見在水勢情形若何及如何留心宣洩防範可以永遠得力之處著卽熟着情形據實覆奏不得稍存迴護將此各傳諭知之尋奏臣等前於陶莊新河對岸玉皇閣向北

開挑引渠歸入陶莊並於引渠進水下層築成兜水柴壩將來大  
汛時水勢增長相機開放由北岸徑趨陶莊新河則玉皇廟南岸  
之順黃壩埽工益可穩固下游又有木龍一架挑溜直下於河尾  
亦爲有益均可長遠得力得旨覽奏欣慰○戊子以劉壩玉保永  
來俱爲內閣學士

劉壩由侍郎銜玉保由翰林院侍讀學士永來由光祿寺少卿遷

○辛卯刑部

議奏四川民婦馮龔氏毆傷伊夫馮青致死馮龔氏擬斬伊子馮  
克應實水知情請免議一案奉諭駁令四川總督覆訊今據該督  
咨稱馮青被毆身死時伊子雖不當面但迫於母命隱忍不言到  
案時又未能供出實情遵旨酌加薄罰照不應重律杖八十等因  
已如所奏行請嗣後如有父爲母殺其子到案猶復隱忍不言較  
母爲父殺子爲父隱者不同應照違制律杖一百以示區別從之  
○癸巳諭據鄂輝等奏巴勒布人等一聞大兵掩至俱未敢抗拒

卽先行逃歸本處業將濟隴被搶之地收復並安撫遷避之唐古特人等見復傳喚巴勒布之頭目俟到來時曉諭後再行奏聞等語鄂輝等此次辦理巴勒布事務尙屬周詳鄂輝成德巴忠穆克登額張芝元均著加恩交部議敘兵丁著各賞給一月錢糧○甲午諭軍機大臣等此次巴勒布侵擾後藏邊界總由衛藏距川省內地道路險遠糧運艱難調兵赴剿一時不能速到以致宗喀濟隴聶拉木三處均被搶占見經鄂輝等帶兵前往番眾畏懼先行退避昨據該將軍等奏巴勒布所占地方業經全行收復邊界廓清其大頭人爲雪所阻俟天氣晴暖卽前來叩見再宣諭威德曉諭以順逆令其輸誠歸服永遵王化卽次第撤兵等語巴勒布原因與唐古特人眾爭競故至後藏邊界侵擾今經鄂輝等向其頭人剴切曉諭番眾等懷畏天朝威德從此自不敢再犯邊界但兵可

百年不用不可一日無備而軍行糧隨尤關緊要四川爲產米之鄉向來米價最賤朕嘗閱該督奏報糧價清單至打箭鑪地方每米一百石卽需銀四五兩不等自由該處距省已遠兼之地方磽确山徑險峻產米較少販運維艱是以價值比內地數倍增昂況打箭鑪以西口外地方其糧價較之打箭鑪自必更須加增與其待需用之時臨期挽運不特緩不濟急抑且費用不貲莫若於尋常無事糧價平減之際交地方官採買儲備擇其易於運送時由雅州一帶陸續運至打箭鑪及察木多兩處分貯儻因口外難運不妨交使人零星帶運不拘石數但能源源運往卽可積少成多設遇徵調需用易於就近裹帶以利進行而資口食況打箭鑪察木多等處糧價本昂節年運往之糧出陳易新所得盈餘又可供零星運腳之費旣可不至虛糜而於邊儲更屬有益著傳諭李世

傑卽通盤籌畫將川省內地米石價值若干由雅州運至打箭鑪需用腳費若干由打箭鑪遇便運至察木多需費若干並將來出陳易新能否敷運腳之用及如何酌定章程妥協辦理之處詳細查明悉心確覈議奏至藏內向來亦無儲備此次調兵赴勦口糧一項慶麟等辦理不善始則諉諸內地繼復不將給價之處曉諭喇嘛及唐古特人等紛紛派辦幾至該處人眾受累抱怨經朕屢次訓飭爲之多方籌畫並令巴忠傳旨剴切開導伊等始皆踴躍輸供得無貽誤但以官兵所用取給喇嘛商上雖寬予價值究屬不便嗣後應於藏內附近處所就近採買青稞糴粃等項妥爲儲蓄於支放兵糧時出陳易新旣可以有備無患亦不至蠹朽爲虞自屬妥善其如何定列章程之處著傳諭巴忠舒濂普福等會同妥議具奏至巴勒布之搶占宗喀等處地方總由藏內番兵素未

訓練且零星徵調先後不齊加之懦怯成俗一見賊匪卽行退回不能固守所致屢經有旨諭令巴忠等將來應定擬章程認真操演以備巡防著再傳諭巴忠等卽於籌辦善後事宜時遵照妥議並將此二事告知達賴喇嘛與噶布倫等悉心商酌此係朕爲保護衛藏僧番人等起見想達賴喇嘛等聞知自無不感戴樂從也將此由六百里各諭令知之○諭阮惠於未出官兵戒其黨類不許戕害俾得陸續進關着其作爲尙屬恭順將來再行遣人到關顯敬情詞誠懇卽可相機藏事至福康安於受降後自不便久在鎮南關駐紮但徑回粵東省城究恐鞭長莫及或酌量移駐桂林省城及南甯太平等處料理一切事宜總俟秋冬閒諸凡妥協該處已無應辦之事福康安奏到後候朕旨令其回任再行起程回至粵東省城至阮國棟黃益曉二人上年隨黎維祁眷屬進口此

次黎維祁逃竄又復隨同入關福康安酌令與黎維祁同在一處安插並將求進內地之人就邊地遠近酌量安插之處所辦甚是俱宜妥爲安頓使之得所不可稍有惜費潘啓德前經吳初旬引抗拒不從又隨同官兵進剿頗知大義福康安奏請以千總守備等官錄用所見亦是其夷目阮廷沛黃廷球阮廷禎三人不肯附賊挈同家口入關殊爲可憫亦應以千總補用安南生員阮賢旣因指引官兵進口一同入關亦不妨卽令其入於內地儒學其遊擊張會元守備勞顯旣查明未經見過阮惠並無畏懼情事不必再行治罪應卽令各回本營當差又具奏因傷殘廢兵丁其糧缺卽於該兵子弟內挑補若並無子弟當於公費內酌撥養贍其撤出官兵尙係出力打仗應賞一月錢糧等語所辦俱好其續調之廣東兵三千名昨已有旨令其撤回並著福康安再加酌量如無

需用卽當檄令回營如尙有須分撥彈壓巡防之處亦不妨暫留該處俟無事時再行歸伍○丙申諭前因許世亨隨同孫士毅收復黎城甚爲奮勇因加恩晉封子爵嗣以該提督殺賊陣亡其子爵仍令伊子承襲本日召見升任副將慶成詢以安南情形據稱阮惠糾眾搶奪黎城時孫士毅與許世亨帶兵前進見賊匪眾多在富良等江據險抗拒孫士毅卽思渡江剿殺意欲捐軀同殉經許世亨再三攔阻並告以總督係統兵大臣非鎮將可比設有疏虞於國體攸關未便輕入遂派慶成護送並令薛忠牽挽孫士毅馬韁退出卽帶領將弁等大呼直進奮勇衝殺旋即陣亡等語許世亨在軍營連次與賊打仗奮勇出力懋著勤勞當此危急之際又復能持國體力勸孫士毅統師入關設無該提督勸阻孫士毅孫士毅不能退出大體所關更屬難於辦理許世亨深知大義見



及於此實堪嘉憫許世亨著晉贈爲伯卽令伊子承襲其千總薛忠著福康安查明以應升之缺升用以示鼓勵矜惜至意○庚子諭軍機大臣等安南夷目阮有明等一聞傳喚卽速前來經福康安令湯雄業使之進關接見詳細詢問該夷目等語言舉止十分恭謹看此情形阮惠實已誠心畏罪安南地方險遠又多瘴癘不值大辦自不如俟其前來乞降相機處事見今福康安令湯雄業密諭阮有明等告知阮惠親自到關齎表求降若阮惠遵諭親來福康安等當面諭以爾係安南土酋乃敢抗拒官兵戕害提鎮大員罪在不赦本部堂奉命前來調集大兵分路進剿本欲將爾地方全行蕩平抗拒之人盡數誅夷今因爾自知畏懼屢次敬關籲懇且於未回官兵不敢加害陸續送出尙屬可原本部堂仰體大皇帝好生之德當爲奏聞大皇帝俯准歸誠不加進討或可格外

施恩向其剴切面諭使之束身歸命詣關懇請候朕定奪降旨至  
黎氏宗族舊臣恐被阮惠戕害求我內地存活自未便拒而不納  
所有黎維祇等俱應送至桂林省城與黎維祁一同安插但恐黎  
氏人數較多生計拮据著福康安飭令地方官酌量撥給房屋養  
贍外並加恩再賞給銀二百兩俾資用度其潘孟賢等亦應與潘  
啓德同住一處潘啓德始終出力忠節可嘉前據福康安奏請以  
守備千總錄用尙覺職分略小潘啓德著加恩竟用爲都司伊曾  
爲諒山都督其才具想屬可用著福康安再加察看如潘啓德能  
勝都司之任卽以實缺奏補其所得廉俸亦足以養其子弟如潘  
啓德係屬夷官未諳內地營伍卽著賞給都司銜俸仍再賞銀一  
百兩以示優恤○癸卯諭舒常李封前在湖北督撫任內因循廢  
弛又不能留心保護隄工以致上年荊州被淹是以將伊等革職

仍留工所效力今該處隄工業已完竣舒常著賞給頭等侍衛仍  
在乾清門行走李封年力就衰著賞給按察使銜卽令回籍○丁  
未諭從前安南內訌黎維祁攸關請救朕念該國恪恭職貢百有  
餘年今旣遠來控訴不得置之不辦是以特允孫士毅所請帶兵  
出關進剿阮惠望風震懼遁回廣南官兵出關以後未及一月卽  
將黎城收復原無難乘勝長驅窮追深入但念諺處地多瘴癘兵  
夫易染疾病且黎氏近年以來搆亂多故黎維祁又復怯懦無能  
優柔廢弛左右亦無可恃之人安南雖屬彈丸僻壤而立國已久  
興廢亦未必不關氣數今其國事如此看來天心竟有厭棄黎氏  
之意朕於孫士毅未奏克復黎城之先屢經降旨諭令於收復後  
卽行作速撤兵乃孫士毅未能遵旨撤兵耽延一月有餘以致阮  
惠糾眾復來與黎維祁爲難黎維祁怯懦先逃官兵始行退出鎮

將武弁聞有傷亡亦因臨陣猝遇玉石不分而許世亨等奮勇捐軀均已從優獎敘見在本應調集各路大兵整軍問罪方今國家全盛餉足兵精天戈所指無不立就蕩平區區廣南一隅豈能始終抗拒特因安南地方水土惡劣瘴氣甚盛實不值損我師徒蓋將弁兵丁等若不爭先用命猶可治以退怯之罪今舉而委之瘴鄉朕心實所不忍即使集兵會勦竟將阮惠擒獲廣南境土收入版圖又須設官員兵弁防守其地該處水土惡劣不能久駐且人情狙詐反覆無常前代郡縣其地者不久卽生變故歷有前車之鑒難保數十年後不復滋生事端將來大軍撤後若又另立一人主持國事仍與阮惠無異豈不徒勞兵力是此事不值大辦朕已洞燭先幾胸有成見所以黎城奏捷之時早經降旨撤兵不待事後始行定計不復興師進討也朕臨御五十餘年辦理庶務惟日

孜孜並非老而厭兵畏難息事卽如從前平定準噶爾回部金川及甘肅臺灣逆匪無不運籌宵旰指示機宜仰賴上蒼嘉佑鑒朕不得已用兵之心並非出於好大喜功故所向克捷膚功迅奏今安南之事揆之天時地利斷無勞師遠涉之理且王者有分土無分民亦不忍使該國夷人頻撓鋒鏑是以決計不復用兵況阮惠已震懾聲威市月之間三次乞降且將迷失兵夫供給資送將來伊若果誠心懇乞赴闕求恩或可鑒其悔罪惻量加封號若竟疑懼不敢親來亦不過赦其前罪斷不加以封爵朕之撫馭外夷恩威並著大義昭然無不仰體上天好生之德從未敢稍萌窮兵黷武之見天下臣民諒無不共見共聞特將辦理安南始末緣由通諭中外使咸喻朕意焉○庚戌賞河南魯山縣七世同居之生員傅麟瑞御製詩章御書匾額○辛亥賜胡長齡等九

十八人進士及第出身有差○壬子諭向來遇升殿行禮都察院堂官俱在殿上西邊站立而丹墀下儀仗前分上中下三段共設糾儀御史六員不足周覽管攝今思丹陛上不過王公數人大學士都察院堂官耳目較近盡數糾查儀文自能整肅而丹墀下行禮人員較爲眾多自非御史六人所能稽察周到嗣後著於都察院堂官內輪往二人在頭層品級山兩旁站立督率再於每品正從東西不拘滿漢科道各派一員專司彈壓科道員數較多每次止用三十六員儘爲寬裕於朕未升殿以前著在品級山兩旁向上按排分立屆時留心稽覈如行禮人員有越班不齊者既可隨時指示而於錯誤不遵者亦無難指名糾劾更足以昭體制而肅朝儀著爲令○癸丑諭軍機大臣等此次進勦安南朕於奏報收復黎城時御製記事文一篇卽以黎氏近代以來構亂頻仍或係

天厭其德是以出師以定亂班師以知退不欲窮兵深入勞我師  
徒此皆朕欽承 天道洞悉先幾著將御製文鈔寄福康安閱看  
安南素稱能文並可宣示阮惠使之明喻朕意今阮惠屢欲籲懇  
降附已定議不復用兵然阮惠係安南土酋敢於傷害提鎮其罪  
甚重雖由阮惠與黎氏爲難臨陣之際彼此未能辨識而許世亨  
等亦因奮不及顧深入捐軀但阮惠抗拒官兵傷及提鎮之罪究  
難解免今若不親身赴闕請罪乞恩豈能遽加封號此時阮光顯  
想已到闕著福康安再向該夷目諭以爾國自相構釁天朝念黎  
氏恪共職貢百有餘年旣已遠來控訴不得置之不辨至克復黎  
城後封黎維祁爲國王而黎維祁昏懦無能棄印逃回難以自立  
不值復加扶植大皇帝於收復黎城時卽恐黎氏不能振作御製  
記事文內推原立國興廢之故論及於知止不殆佳兵不祥以期

不違天道仰見大皇帝無事不順天而行豈肯於阮惠歸誠之後  
羈留不遣復將無能之黎維祁送其歸國見在黎維祁安插桂林  
省城原念其止於無能不便加之誅戮酌給養贍不過等於編氓  
已爲再造之恩並無復令歸國之意爾卽遣人至黎維祁處看視  
亦無不可總之天朝撫馭外夷逆則加以征討順則永受寵榮如  
阮惠不能親自赴闕頌懇僅遣親屬入關進貢雖係出於惻怛亦  
難仰邀收納蓋因阮惠戕害大員獲罪甚重卽使將通國珍奇盡  
數呈獻亦不能償我提鎮二員報國之忠豈可遽思贖罪也 御  
製安南記事文曰安南雖南瀛小邦耶然亦有民人焉有社稷焉  
且奉本朝正朔稱外藩者百餘年其邦遭亂興滅繼絕禮亦宜之  
是蓋奉天道也然彼邦之遭亂豈無所由且其據黎城而擅號召  
者原非一姓也則自古至今主中華而稱正統者率可知矣雖乘



除有命而興亡在人順天者昌逆天者亡吁是不大可畏乎黎城  
既復嗣孫重封其陷於阮之土地以次傳檄而定二阮窮蹙竄歸  
廣南廣南去黎城又二千餘里是役也官兵裹糧以進設臺站以  
運不資安南一草一木而安南荒亂之餘亦不能供軍儲也官軍  
纔萬餘而臺站運糧之夫將用至十餘萬則勞內地矣因護外小  
邦爲之埽穴執醜而勞內地是大不可也且旣已爲之興滅繼絕  
則彼之竄寇應付彼平之夫以國家之力抵廣南執二醜亦優爲  
之但權其輕重知止不殆佳兵不祥且安南亦一小邦也黎氏近  
代以來鮮有能爲自強之君或者天將厭其德乎夫天厭其德之  
邦而予助之則予豈敢出師以定亂班師以知退或者不違天道  
而有合於王者之師乎是爲記

五月己未諭軍機大臣等據福康安等奏阮惠親姪阮光顯敬齋

表貢進關乞降並籲懇進京入覲等語此次阮惠遣伊親姪求降進表其情詞迫切實屬出於至誠已另降敕諭令福康安宣示看來此事即可完結阿桂奉使在外自必心存懸注著將本日福康安等奏到各摺並所降諭旨及阮惠表文一併鈔寄阿桂閱看○敕諭阮光平曰敕諭安南阮光平知悉據協辦大學士兩廣總督公福康安等奏爾遣親姪阮光顯敬齎表貢抵關乞降等語將原表呈覽朕閱爾表內稱爾先有廣南之地非與黎氏有上下之分上年曾遣人叩關備陳與黎氏構釁緣由邊臣駁書不卽遞達嗣官兵出關征勦直抵黎城爾於今年正月前至黎城欲向黎維祁詢問籲請大兵之故不料官兵一見爾眾奮勇殺戮爾手下人等猝難束手就縛又值江橋折斷官兵致有損傷不勝惶懼已屢次遣人叩關請罪並送回未出官兵其戕害提鎮之人業目覩正法

本應躬詣闕廷陳情請罪因國內初罹兵革人情惶惑尙未安集  
謹遣親姪阮光顯隨表入覲並據阮光顯稟稱爾侯國事稍定向  
乞親自到京瞻覲等語安南黎氏臣事天朝恪供職貢百有餘年  
爾在廣南從前並未修朝貢上年黎維祁母妻赴關控訴以爾構  
亂稱兵占據其國籲請救援此事爲天朝字小存亡體統攸繫是  
以前任督臣孫士毅自請帶兵出關爾雖曾遣人叩關辨訴但守  
邊之臣向來止知安南有黎不知有阮駁回原稟亦經奏聞所辦  
甚正然督臣孫士毅奏克復黎城之後朕卽以黎氏國內多故黎  
維祁又復怯懦無能看來天心竟有厭棄黎氏之意朕從來辦理  
庶務無不順天而行隨卽諭知孫士毅黎城旣復當卽撤兵乃孫  
士毅未能遵旨速撤在彼耽延茲爾率眾至黎城欲向黎維祁詢  
問官兵在彼豈有坐視之理遂爾奮勇相戰爾手下人眾畏死抵

拒致傷我官兵在提鎮等職司勦禦其臨陣捐軀俱堪嘉憫已從優議卹將許世亨封以伯爵總兵二人皆予世職並入昭忠祠以示獎勵爾以安南頭目敢於抗拒官兵戕害提鎮大員獲罪甚重是以將福康安調任兩廣總督原令調集各路大兵整軍問罪但念爾屢次遣人叩關請罪是爾尙知畏懼天朝朕憐汝誠心悔罪已往之事不復深究矣但非親身詣闕請罪乞恩僅遣爾姪阮光顯隨表入覲遽思仰邀封號天朝無此體制爾旣未列藩服所有貢物亦未便收納著仍發交領回如爾必欲輸誠納款乾隆五十五年八月屆朕八旬萬壽維時距今又越年餘爾國內亦當安集爾卽可稟知督臣親自赴京籲懇以遂瞻雲就日之私再於安南地方代爲許世亨等建立祠宇春秋虔祭庶可稍贖前愆屆時朕鑒爾感畏惴忱自必格外加恩或卽封以王爵世世子孫可以長

守安南彼時再呈進貢物亦即可賞收仍當加之厚賜以示優眷  
朕臨御五十餘年凡庶邦藩部無不待以誠信黎維祁柔懦無能  
棄印逃竄若律以天朝擅離職守之條尙當重治其罪今念伊係  
屬外藩僅止無能尙無違犯令在桂林省城安插斷無乘爾入覲  
復將黎維祁送回安南之理已諭督臣福康安等轉飭伴送官員  
同爾姪阮光顯於經過桂林省城之便親行看視黎維祁光景並  
令爾姪詳悉寄爾知悉爾更可無所用其疑慮茲特賜爾珍珠手  
串一挂爾當祇承恩命計程於明年六七月內至京親詣闕廷懇  
請以冀永承渥眷勉之欽哉特諭○辛酉諭軍機大臣等黎維祁  
因無能失國棄印潛逃今姑寬其失守藩封之罪安插桂林省城  
酌給養贍比於編氓若聽其仍舊蓄髮服用該國衣冠與內地民  
人迥異殊於體制未協著傳諭該督撫卽令黎維祁並伊隨從人

等一體薙髮改用天朝服色將來阮光顯經過桂林時與黎維祁會晤見其業經薙髮服色改易斷無回國之理並可令阮光顯差人回國寄知阮惠俾得釋其疑畏○乙丑諭軍機大臣等昨吏部奏帶領各官引見摺內有原任甘肅階州直隸州知州顏培天一員係福康安在陝甘總督任內辦理計典填註才力不及者經該部帶領引見觀其年力正屬富強人亦明敏與福康安填註之語適屬相反已發往直隸以同知補用該員原係直隸州知州各省州牧中有此強壯明白之員一經該督撫保送引見朕方當交軍機處記名簡放知府何至以才力不及竟罹參劾此事若在富綱巴延三限於才識察屬未能明當者朕必以爲該督撫所劾未公卽降旨飭詢福康安平日辦事細緻於屬員賢否亦能留心察看而眼力又不平常不應錯誤至此若福康安果於屬員才具如此

不能周察則伊見管兩省所轄文武員弁甚多又安能望其舉錯得當耶或因顏培天在任辦理地方事件有未能妥協之處抑或該管司道與之不睦因於大計時將伊填註揭參福康安亦未加深究據詳具題但該員在任若果有貪酷不法等項劣蹟早應隨時專摺參奏革審何待大計始行辦理今既列入計典應劾人數之內則該員究係因何過失致干參劾殊不可解外省上司於所屬中有素不愜意之人因特參旣無劣蹟不參又難優容於計典時填劾者往往有之如今日引見之顏培天一望而知非庸愚之人或將該員列入浮躁及不謹之條尙可斷非才力不及之人也若按例行則似朕不會洞見而任督撫任意軒輊矣卽如福康安爲朕素所倚毗或竟有劾其別項款蹟者朕尙不免疑信參半必須究詢明確若有參其才具平庸年力衰邁者則其言之謬不待

辨而自明今以年方壯盛之員觀其光景有過無不及而福康安  
填以才力不及殊屬擬不於倫朕向來辦理庶務必期明悉底裏  
從不肯稍涉顛預除交軍機大臣就近傳詢顏培天外著傳諭福  
康安即將從前填註該員才力不及之處是否係該管司道與之  
不睦故爲填註申詳福康安僅據詳題達扣係因該員辦公另有  
不妥或竟有意存滿假偷安耽於酒色不理政務或性情乖張急  
於見長皆可而斷非才力不及之人也福康安係受恩深重之人  
卽一時見有未到以致舛誤旣經朕降旨詢問自當切實陳明亦  
可無所用其疑懼諒伊必不至意存迴護以致人才稍有屈抑務  
須據實秉公詳晰覆奏○己巳諭刑部嗣後凡殺死一家三四命  
以上者兇犯之子交內務府閹割以示懲創○免陝西潼關等三  
廳州縣通賦○甲戌諭永來係海望之孫朕念伊祖授伊爲內務



府護軍統領內閣學士自當感激朕恩奮勉習學今日具奏本章  
竟至遺忘數件此皆伊福薄之所致也從前似此者全行革退著  
加恩將永來革退內閣學士仍留內務府護軍統領以觀後效○  
己卯諭軍機大臣等朕思阮光顯等此次進表乞降之後既趕回  
黎城告知阮惠該國臣民共生歡幸一面令阮有暉等齎送謝儀  
詞令禮文較前倍加恭謹看其感激畏服竟屬出於至誠阮光顯  
所稟阮惠進京瞻親之處定非虛語明年如果阮惠親自來京卽  
當特降恩綸加封王爵優予賞賜著福康安再行剴切敷諭阮惠  
以明年恭遇大皇帝八旬萬壽果能自行詣闕抒誠大皇帝必當  
格外加恩予以王爵渥受寵錫爾之子孫亦可世守安南永被藩  
服如此明切諭知自不至更生疑慮計此時阮光顯應已自黎城  
同至諒山候信福康安接奉前旨後自必諭知該日卽令湯雄業

帶同起程於經過桂林時與黎維祁相見並應先期令黎維祁薙髮改用天朝服色使阮光顯見其業經薙髮服色已改斷無回國之理既可釋其疑畏而該夷目於七月二十外行抵熱河正值蒙古諸王公台吉俱來朝覲俾得同邀宴賚之榮將來回國時向阮惠一一述及益可見天朝如此曲賜優容渥加恩待阮惠自必堅心欣戴踴躍來朝至所奏夷目潘啓德阮廷沛等業已令其薙髮自應如此辦理但何以又未想到黎維祁令其一併薙髮朕早經降旨諭及福康安務當於阮光顯未到桂林之前先行遵辦爲要聞五月丁亥諭凡下嫁外藩固倫公主例支俸銀一千兩如係在京居住者卽照下嫁八旗之例支給從前和敬固倫公主雖係在京居住而俸銀段匹仍照外藩之例支給領年久未便裁減是以降旨仍許照舊關支今和孝固倫公主係朕幼女且在朕前承歡侍

養孝謹有加將來下嫁後所有應支俸祿亦著一體賞給一千兩以昭平允而示嘉獎○庚寅 上啓鑾秋獮木蘭○免經過地方本年額賦十分之三○甲午諭前因吏部帶領引見各官內有原任甘肅階州直隸州知州顏培天一員係福康安在陝甘總督任內辦理計典填註才力不及者觀其年力正屬富強人亦似去得與福康安填註之語相反特將該員發往直隸以同知用並以福康安不應察屬錯誤若此降旨詢問令其據實覆奏茲據奏稱該員於進見時詢以地方事件不能登答其精神甚覺委靡細加察訪竟是嗜酒廢事彼時原欲專摺劾參因其年力正屬富強一經參革卽廢棄終身是以於大計疏內填註才力不及等語各省督撫察吏是其專責如果所屬中有嗜酒廢事貽誤地方之員卽應隨時糾參何待大計始行辦理況計典之設原爲激濁揚清使人

知所懲勸該督撫於填考時自應加意斟酌以期舉錯得當豈可因慮屬員廢棄轉爲姑息調停之計各省督撫於計典作如此者往往有之而福康安受恩深重則不應出此朕臨御五十餘年辦理庶務無論鉅細靡不躬親綜覈卽如顏培天平日之嗜酒與否朕何從知悉其日朕御出入賢良門閱射奏事九卿等無不目所共覩詢之伊等亦僉稱顏培天似非才力不及之人維時朕若將顏培天照例降調則似朕未經鑒別九卿等或竊意因該員係福康安所劾故曲照所請矣福康安自知錯誤若止據實陳覆朕念其屢經出力未始不可加恩免議今乃以顏培天一經參革必致終身廢棄爲詞不免意存迴護轉難寬宥福康安著交部議處嗣後各督撫等於大計時宜秉公察覈確切填註毋得意存軒輊進退失當朕於諸臣功過賞罰一秉大公不存畸重畸輕之見若各

督撫於激揚重典不知慎重辦理以致舉劾不公經朕察出則咎由自取矣將此明白宣諭中外知之○乙未諭杜爾伯特親王車凌烏巴什自投誠以來三十餘載在御前行走多年甚屬奮勉今伊舊病復發遽聞溘逝朕心深爲惻惻不覺淚下著加恩賞銀一千兩料理喪事卽交保泰山該處銀庫內撥給仍派御前侍衛惠倫前往賜奠聞伊妾懷孕兩月車凌烏巴什在日實屬出力將來必能副朕期望之意得產一男承襲王爵永沐朕之深恩也○丙申 上詣熱河 文廟行禮 上駐蹕避暑山莊○辛丑兩廣總督福康安等奏臣將前賜阮光平敕書珍珠手串派員齎至鎮南關二十五日阮光顯進關跪閱敕書叩頭不止稱小邦番目親屬今日捧誦 綸音敬感 聖德 天威俯鑒我叔阮光平殷懇畏悚微忱宥其前罪復許投誠格外寵以璽書頒以珍物萬分榮耀

今既奉 大皇帝恩旨准令進京卽不敢再行出關當令陪价阮有珷等恭捧 敕書恩賞並齋檄諭至諒山遣該處鎮目護送黎城並親自寫信寄知阮光平諄屬速修謝表並懇請於明年入京瞻觀察其神色實屬喜出望外此次護送阮光顯等進京臣等遵旨令湯雄業總司其事但尙須武職大員一同照料已派廣西新大協副將德克精額前往鎮南關照應其南甯至鎮南關一帶夷使在途行走飭左江鎮總兵普吉保往來照料查察諭軍機大臣等此事福康安辦理妥協殊屬可嘉覽奏深爲欣悅前已有旨令福康安俟阮光顯起程赴京阮惠謝表送進具奏後先回廣東到任並料理各事著再傳諭福康安卽遵照前旨趁此無事之時回署看視計算阮光顯自行在同至桂林之前再赴粵西照料出關等事此係朕念福康安辦事出力是以特加體恤也○乙巳諭巡

梔木一千八百根至通交納每幫各六百根經和琳親往驗勘丈量圍圓三尺六七寸至二尺四五寸長五丈有零至三丈有零不等並詢據運弁稟稱梔木長大非架木桐篙可比若捆縛船旁開口金門不能容納若掛掛船尾則上水打鬧甚屬費力等語此事大奇殊出情理之外各省糧船向來止准丁舵人等攜帶土宜每船亦止以一百二十石爲度李天培身爲臬司漕務與伊並無關涉該員有自用木植理應自行運解何得派令糧船分帶冀省腳價並透漏關稅以致漕運遲滯伊以此圖占便宜卽其購買木植時恐尙不免有短發勒派情弊况臬司旣敢以私物派累官船則督撫藩司勢必紛紛交帶而道府以下各官又相率效尤有礙於漕政者甚大不可不從重辦理以儆其餘且李天培係屢經獲罪

之人經朕加恩棄瑕錄用乃不知感激自愛復有貪利誤公之事  
尤難寬貸李天培著革職發往伊犁效力贖罪其湖北按察使員  
缺著成汝舟補授和琳親往查明據實參奏不稍瞻徇甚屬可嘉  
著交部議敘其派委查出木植之遊擊周龍章並無諱飾亦屬可  
嘉著交與李奉翰遇有應升之缺題補以示鼓勵至梳木至一千  
八百根之多捆縛船旁無難一望而知毓奇身為總漕有籤盤之  
責何以並不查參卽項家達係江南巡漕於各船行進瓜口時亦  
不得諉爲未見畢沅惠齡近在本省該臬司有此勒令官船裝載  
多木之事因何不行查禁參奏其咎俱無可追畢沅毓奇惠齡項  
家達均著交部嚴加議處再本年運河水勢充裕江浙各幫行走  
迅速方冀可符冬兌冬開定制乃江廣各幫復以阻風水淺爲詞  
脫幫遲滯見據和琳查明湖北幫船因米石不齊兌開逾限則江



西湖南幫船遲緩其弊大抵亦由於此除湖南署糧道張官五已交部嚴加議處外其湖北江西糧道亦著該督撫查取職名交部嚴加議處以示懲創○辛亥予安南陣亡廣西提督贈壯烈伯許世亨諡昭毅廣西左江鎮總兵尙維昇諡直烈閩粵南澳總兵張朝龍諡壯果並予祭葬入祀昭忠祠○是月雲貴總督富綱等奏前奉旨賞回緬甸猺夷六名內有內地隴山土司夷人二名當發該土司領回其孟五等四名係阿瓦蠻猺夷隨交騰越鎮總兵劉之仁知州屠述濂令其行知老官屯頭目遣人到關請領昨據該鎮州稟稱老官屯大頭目渺蘊來信云去歲我國細哈覺控等到天朝進貢蒙大皇帝重賞遣回到木邦遣人先行報信我國王子不勝感激及細哈覺控到阿瓦時王子迎出三站接進城中舉國臣民莫不感戴天朝今又遣回孟五等四人愈加感悅

已差人稟報王子侯王子信到卽差人到鐵壁關請領等語看其如此慎重將來遣人到關必別有懇求之事臣等見委蒙化同知朱錦昌馳赴騰越會同該鎮侯渺蘊差人到關將孟五等四人令其領回並密飭朱錦昌察看來目情形如彼國有差使人請封口氣卽作朱錦昌己意以大皇帝施恩准令爾國納款內附今復賞還留人皆因爾國長誠心向化所致明年係大皇帝八旬萬壽爾國長果虔誠遣使前來督撫大臣必爲代奏大皇帝亦必格外加恩如此曉諭來人令其歸告渺蘊轉達該國長俾孟隕聞知益堅向化之心得旨嘉獎

六月丙辰成都將軍鄂輝等奏巴勒布畏罪輸誠遣頭目來營乞降臣等察其意誠隨將唐古特番兵先行撤動一面宣布恩威設法招致茲據總兵穆克登阿等帶領巴勒布大頭目噶登嘛撤海

哈哩烏巴第哇等環跪營門悔罪乞恩稟稱我等遠在邊外本與唐古特和好常來西藏交易近因西藏人將我等貨物任意加稅並於食鹽內攙入砂土我等實不能堪冒昧侵犯邊地今大兵遠來我等不敢抗拒望風退回今蒙將從前在藏滋事之噶布倫並加稅之第巴等均革退治罪又將辦事駐藏大臣更換莫不感仰大皇帝公正嚴明額手稱頌臣等隨向宣布威德大兵所向屢著蕩平並將如天好生之心向其一一曉示番眾等叩頭畏服隨令西藏噶布倫第巴等將減稅售鹽等事說明立定規條勘明邊界各設盟誓並取具該部落永不滋事圖記番結交噶布倫收存備案所有漢土官兵當令分起全撤當換臺站隨營糧員俱以次撤回其前藏濟甯轟拉木宗喀脅噶爾等處俱各慎選總管給與執照委牌飭令妥爲經理復諭噶布倫第巴等隨時查察教養兼

行俾令安分守法以仰副 皇上愛護唐古特僧俗番眾之至意  
下部知之○庚申諭朕閱國史館所進貳臣傳乙編內薛所蘊張  
忻二人俱曾順從流賊後始歸降本朝嚴自明則既經投誠後於  
尙之信謀叛輒復從逆嗣又與尙之信同降此等從賊反覆之人  
俱於列傳之例大爲不協夫人臣策名委質忠於所事旣遇宗社  
改移自應抗節捐軀方無愧在三之義是以明末殉難諸臣朕嘉  
其忠烈特爲賜諡雖其中有曾經抗我旗行者亦令一併褒諡蓋  
以各爲其主在本朝則爲梗化而在勝國不失爲效忠未忍令其  
湮沒弗彰爰爲之錫諡表揚以發幽光而昭激勸至在前明業經  
身登仕版繼復臣事本朝者伊等能知天命攸歸率先投順且間  
有功績可紀不可擯而不錄第因其大節究屬有虧因特命第其  
優劣另立貳臣傳分爲甲乙二編於忠厚之中仍寓激揚之道所

以垂教於萬世者甚大此內卽有歸順之後又去而從唐桂福潞各王者雖其人反側無定然唐桂各王究爲明之宗支尙可託辭於繫懷故主卽列入乙編不至有乖史例若薛所蘊張忻嚴自明諸人或先經從賊復降本朝或已經歸順又叛從吳耿尙三逆進退無據惟知嗜利偷生罔顧大義不足齒於人類此外如馮銓龔鼎孳金之俊等其行蹟亦與薛所蘊等相倣皆覲顏無恥爲清論所不容而錢謙益之流旣經臣事本朝復敢肆行誹謗其居心行事尤不可問非李永芳洪承疇諸人歸順後曾著勞績者可比若爲之立傳其何以勵臣節而示來茲國史爲天下大公是非筆削法戒凜然豈可稍容假借所有貳臣傳甲乙編內如馮銓龔鼎孳薛所蘊錢謙益等者著該管總裁詳細查明槩行奏聞撤去不必立傳若以伊等行爲醜穢一經刪削其姓名轉不傳於後得倖免

將來之警議不妨僅爲立表排列姓名摘敘事蹟並將此旨冠於表首俾天下萬世共知似此行同狗彘之徒既不得炳丹青之列仍不能逃斧鉞之誅於彰瘡更爲有益該總裁等其悉心校覈以副朕扶植綱常折衷公當至意○甲子吏部議奏灑帶李天培木植及江廣漕船遲誤之處並不據實參奏之漕運總督毓奇等分別革職降調其查明據實參奏之巡漕御史和琳照例加級得旨毓奇身爲漕運總督項家達特派巡視南漕稽查糧運是其專責乃於江廣各船開行遲誤並不豫行檄催迨至節節脫幫仍思曲爲迴護不將該管糧道等遲開捏報各情弊據實嚴參且湖廣通幫因代李天培灑帶桅木以致耽延多日毓奇有籤盤之責項家達駐紮瓜儀此項桅木至一千九百五十根之多根件又復長大細縛繫帶無難一望而知毓奇項家達甯得譏爲未見輒敢有心

徇隱及傳旨詢問尙以失於覺察捏詞巧辨其獲咎較重非尋常  
錯誤可比况毓奇由巡漕擢任漕運總督八年以來皆有截留守  
陳之事有過無功其不實心經理可知毓奇項家達均著照部議  
革職其漕運總督員缺著管幹貞補授卽速赴運河一帶接印任  
事至畢沅惠齡任聽糧道捏報開幫又不將李天培私帶多木之  
處參奏本應照部議降調但念畢沅向來尙屬能事惠齡在外任  
未久姑著從寬改爲革職留任八年無過再行開復以觀後效○  
乙丑調鄒奕孝爲工部右侍郎以寶光鼎爲禮部右侍郎由宗人府承  
遺○丙寅諭畢沅等奏李天培交與湖廣通省幫船灑帶木植一  
事據李天培供曾向調任糧道王均護糧道王興謨張官五等告  
知該道等雖訊無分肥情事但袒徇同官並不勸阻又不稟揭任  
其灑帶以致遲阻漕船請旨革職拏問押運各官均請革職並自

請從重治罪等語王均王興謨張官五俱著革職拏問交該督等  
審明定擬具奏通判李英譚堯龍俱著革職畢沅惠齡並著交部  
嚴察議奏○諭軍機大臣等昨阿桂及畢沅等先後奏到李天培  
於幫船灑帶木植一千九百五十根內有八百根係福康安託伊  
購辦等語不謂福康安竟有此事福康安爲傅恆之子自幼卽供  
任使素養訓誨受恩有年前歲平定臺灣生擒二醜朕以其著有  
勞績恩錫優渥乃竟有託辦木植一事實出意料之外朕賞功罰  
罪一秉大公前此軍功告蒞既經重予酬庸則此次交李天培購  
辦桅木亦當從重治罪本應將所有公爵並四圍龍補服寶石頂  
黃帶等類盡行革除以示懲創第念見在阮光顯齋表投誠進京  
入覲明年尙有阮惠親自到京叩祝萬壽之事若此時遽將福康  
安公爵降革並改換章服非特觀瞻不肅且使夷眾等見而心疑



甚有關係將來福康安覆奏到時朕再酌量加恩降旨設或無阮惠獻悃歸誠之事則福康安竟至罪無可追朕實引以自愧而又爲福康安幸也著福康安將如何交與李天培購買並是否曾示令其在幫船帶運之處卽速據實覆奏毋或稍有隱飾致負朕格外成全之意至本日據福康安奏阮惠謝表俟水勢消退方可齊送到關等語計今已逾旬日想謝表已可遞到桂林福康安一俟謝表到來卽行迅速奏聞以慰廑注將此由六百里加緊諭令知之○庚午命兵部尙書孫士毅軍機處行走○壬申圖薩布因病解任調郭世勳爲廣東巡撫以陳步瀛爲貴州巡撫玉德爲安徽布政使○癸酉諭軍機大臣等本日據書麟等奏睢甯南岸周家樓又有漫塌隄工之事見在京中大臣內並無諳習河務者若派令前往亦屬無益阿桂歷在豫省督辦堵築事宜其識見亦較爲

諳練伊甫由荊州差旋並據奏於途次受暑頭目昏暈尙未全愈但除阿桂亦別無可派之人已有旨傳諭書麟等自行酌量如伊等可以堵辦完竣無庸特派大臣則已如因工程重大必須請派大臣前往卽一面奏聞一面劄知阿桂以便卽由京前往計阿桂此時不過在近京一帶李天培私帶木植一事已查詢明白阿桂不必前來行在暫留京辦事伊免此一番跋涉在京多爲歇息氣體自易復元儻書麟等知會到時有需阿桂督辦之處卽可就近由京前往其留京事務再交與常青接辦也將此傳諭阿桂知之○調陳大文爲安徽按察使以萬甯爲貴州按察使由河南甯○甲戌諭軍機大臣等據巴忠等奏請將達賴喇嘛兄弟孜仲綏綏等各賞與經典名號俟有別廟堪布缺出卽行補放等語此事不值如此辦理達賴喇嘛兄弟近年並未聞有恣意妄行之處若如

此辦理未免情事張皇此皆巴忠舒濂等議見短淺致有此奏著傳諭舒濂普福等亦照常看待止須密爲留心體察儻伊等有滋事舞弊之處卽行奏聞治罪如無別故不得妄事紛更以示體恤○諭鄂輝等奏據噶布倫等稟報沙瑪爾巴呼圖克圖已到濟甯見在指示巴勒布頭目與噶布倫等同心辦事等語伊等所辦殊屬錯謬此次沙瑪爾巴呼圖克圖特由巴勒布前來辦理一切鄂輝巴忠等自應在彼等候俟其來時與之面晤將朕節次褒獎諭旨明白宣諭使彼益知感奮方爲妥善乃巴忠竟先行起程回藏而鄂輝等亦皆置之不問止留噶布倫數人與伊會晤實屬錯誤巴忠係特旨派往之人尤不應措置失當若此著傳旨申飭並著巴忠於何處接奉此旨卽由該處回至扎什倫布務須面見沙瑪爾巴呼圖克圖並告以我未曾在此等候徑回前藏實屬錯誤今

蒙大皇帝降旨斥責特命復來相見大皇帝以呼圖克圖能知大義深加褒獎賞給數珠等物以示優眷呼圖克圖益當感激聖恩並將朕節次所降諭旨向其明白宣諭伊如何登答之處卽著據實奏聞○禁州縣濫用非刑○丙子諭福康安等奏阮惠卽阮光平因赦其前罪准令降附具表謝恩恭進貢物到關並以明年爲朕八旬萬壽籲懇進京瞻覲祝釐等語阮光平自上年孫士毅撤兵之後自知得罪天朝深懷悔懼將迷失官兵供給資送屢次差人敬關懇求內附至於再三俱經福康安孫士毅嚴行駁回嗣因阮光平復遣伊親姪阮光顯到鎮南關並懇進京入覲經福康安等代爲具奏朕念安南雖僻處海隅然立國已久其興廢亦必關乎氣運黎維祁優柔廢弛是天心已厭棄黎氏朕從來辦理庶務無不順天而阮光平旣已震懾聲威悔罪投誠卅月之間乞降數

次又遣伊姪親齋表文敬關入覲尙知畏懼因命赦其前罪不加進討並令福康安派左江道湯雄業護送阮光顯前來行在瞻觀今復據福康安等奏阮光平因朕准令降附具表謝恩並求於明年親自到京祝釐展覲閱其表文情詞肫切出於至誠且據稱已先爲陣亡提鎮大員築壇奠祭見於國內擇吉立廟請頒發提鎮官銜諡號以便遵照奉祀稍贖前愆等語實爲小心恭順黎氏已爲天心厭棄而黎維祁又棄印潛逃自無復令立國之理王者有分土無分民安南雖屬小國亦不可無人統率阮光平以造邦伊始籲求天朝封爵以爲綏輯民人之計措詞允爲肫實阮光平著卽封爲安南國王所有應行頒給印信敕書等項著各該衙門照例撰鑄俟伊姪歸國時恭奉齋回至阮光平旣封爲國王其所進貢物卽著收留另行加賞朕於臨馭外夷恩威並著叛則討之順

則撫之大義昭然無不仰體天心俾薄海內外悉歸涵育也○諭  
軍機大臣等朕覽阮惠呈進表文極爲恭謹自係出於感激至誠  
而於瞻觀祝釐之處尤屬肫懇殷切諸事未定尤賴正名定分明  
示寵榮以爲綏輯久遠之計已明降諭旨將阮惠封爲安南國王  
並另降敕諭先爲詳晰曉示所有封爵敕印俟阮光顯入覲返國  
時卽令齎回其呈進貢物亦應收納送京候朕另加恩賞再朕因  
阮惠進表謝恩特製詩章御筆親書以賜著與賞阮惠敕諭一條  
發交福康安令福康安揀派滿洲能事道府一員齎送安南面交  
阮惠祇領○賜阮光平敕諭曰敕諭安南阮光平知悉據協辦大  
學士兩廣總督公福康安奏爲爾具表謝恩展陳觀惻朕披閱表  
內詞義肫懇並請於明年進京入覲祝釐具見恭謹所有齎到貢  
物已諭令賞收以遂爾芹曝之獻安南以黎維祗庸憤無能天厭

其德國祚告終爾見已悔罪投誠遣親姪阮光顯奉表瞻覲祈求  
懇切不啻再三朕順天而行有廢有興悉歸大公至正本擬俟明  
歲親行叩覲時賞給王爵茲閱爾表內所稱造邦伊始必須仰賴  
天朝寵榮錫之封號方足以資駕馭自屬實情用是特降恩綸封  
爾爲安南國王俾資鎮撫並親書御製詩章賜爲爾國世寶嗣後  
凡有呈進表詞及本國行文之處俱准其書寫國王名號其應行  
發給印信見交該衙門撰文鑄篆俟爾姪阮光顯到京交與齋回  
至天朝提鎮大員臨陣捐軀爾國內立廟享祀亦足徵悔懼之忱  
所請官衙謚號亦卽敕部隨後頒發爾其益當小心敬畏恪守藩  
封永承恩眷特諭冊文曰朕惟王化遐覃伐罪因而舍服侯封恪  
守事大所以畏天鑒誠惻於荒陬貲其既往沛恩膏於屬國嘉興  
維新賁茲寵命之頒勛以訓行之率維安南地居炎徼開十三道

之封疆而黎氏臣事天朝修百餘年之職貢每趙王會舊附方輿  
自遭難以流離遂式微而控愬方謂興師復國字小堪與圖存何  
期棄印委城積弱仍歸失守殆天心厭其薄德致世祚訖於終淪  
爾阮光平起自西山界斯南服向匪君臣之分寢成婚媾之誓覺  
起交訌情殊負固抗顏行於倉卒雖無心而難掩前愆悔罪疚以  
湔除願革面而自深痛艾表箋額切使先猶子以抒忱琛獻憬來  
躬與明年之祝嘏自非仰邀封爵榮藉龍光曷由下莅臣氓受茲  
鳩集凡此陳詞以實胥徵效順彌虔況王者無分民詎在版章其  
土宇而生人有司牧是宜輯甯爾邦家爰布寵綏俾憑鎮撫今封  
爾爲安南國王錫之新印於戲有興有廢天子唯順天而行無貳  
無虞國人咸舉國以聽王其懋將丹款肅矢冰兢固圉以長其子  
孫勿使偪蒞他族悉心以勤於夙夜罔令逸欲有邦益敬奉夫明



威庶永承乎渥典欽哉毋替朕命 御製詩曰三番耆武匪佳兵  
昨歲安南重有征無奈復黎黎厭德爰教封阮阮輸誠守封疆勿  
滋他族傳子孫恆奉大清幸沐天恩欽久道不遑日監懷持盈○  
戊寅諭孫士毅所有恩賞官銜世職係辦理赴剿臺灣官兵事宜  
所得與勦辦安南一案無涉且已將伊公爵及紅寶石帽頂撤回  
功過已足相抵其從前官銜世職仍著賞留○辛巳軍機大臣等  
議覆四川成都將軍鄂輝等條奏收復巴勒布侵占藏地設站定  
界事宜一前藏向駐綠營官兵五百十員名見有駐藏大臣管轄  
其扎什倫布地方亦應酌撥綠營官兵分駐請於察木多抽撥外  
委一員兵六十名江卡抽撥兵三十名碩板多抽撥都司一員兵  
二十名前藏抽撥兵四十名以上四處共抽撥兵一百五十名卽  
令抽撥之都司外委管領移駐後藏再於馬兵內挑拔二人作爲

軍功外委管束兵丁再後藏旣移駐官兵由後藏至前藏一路應  
分立塘汛十三處以唐古特番兵安設每塘挑選附近番兵四五  
名並交噶布倫等辦給口糧均令駐防後藏都司隨時稽查管束  
一拉子地方請添設唐古特番兵二百名並添第巴二名管領按  
年一次更換至有噶爾番兵亦不敷防守請於拉子防兵內撥出  
三十名安置有噶爾地方其薩喀一處距拉子不遠亦卽於防兵  
內撥出三十名輪赴該處巡哨再宗喀聶拉木濟龍等處遠在極  
邊其緊要處所仍須修砌卡隘堅礮以資瞭望而嚴防守一西藏  
官兵以耕牧爲生見飭噶布倫等按寨落多寡編定數目前藏添  
唐古特兵八百名後藏四百名於每歲九月望後操演至十月底  
止隨同綠營駐防一體練習至操演槍箭於綠營內挑取千把弁  
兵數十名充爲教習令其分領番兵逐日操演惟唐古特兵向無

錢糧今定於派出操演日期至散操日止令噶布倫等酌給口糧  
又達木兵向住達木角地方換班應差今並歸操演番兵內一體  
教習仍照舊令達賴喇嘛月給口糧又查達賴喇嘛山上舊存大  
小鐵礮二十餘位請編定號數令綠營兵帶領番兵演習施放  
請於今歲秋收後查明稞麥時值動項發交該噶布倫等在附近  
各處買米稞麥三千石交駐藏糧員於扎什倫布城內建倉收貯  
俟採買二年後按年出陳易新以六千石常貯爲額至拉里察木  
多巴塘裏塘四處糧臺皆有糧員而察木多尤爲川藏適中之地  
亦請一體儲備一西藏所屬寨落設立第巴管理缺分甚多其間  
美惡不齊然皆有應辦事件請令噶布倫等嗣後無論缺分美惡  
一體補放務令該第巴親往照料不許擅差家丁代理至差遺堪  
布囊蘇赴京進貢並赴打箭鎮辦茶皆係經行內地往返需時請

嗣後均由駐藏大臣會同達賴喇嘛及噶布倫等揀選妥人給與護牌將需用馬夫酌定數目注明牌內沿途照給以杜需索一駐藏大臣應於二人內按年分爲兩次輪赴後藏巡查之便親加操演分別勸懲至藏眾散居各處耳目難周該處設有噶布倫四人管理地方事務嗣後請於四人內每年輪派一人於春秋農隙時親往稽察一從前駐藏大臣二員同居一處自珠爾默特那木扎勒滋事後房屋入官始行分住查前藏之撤木珠康撒爾住房即係從前珠爾默特那木扎勒舊居其地房屋寬敞足敷駐藏大臣二人分住且同居一處遇有公事即可隨時商辦一西藏貿易外番必須老成謹慎之第巴協同該處頭目專管卡契回民及巴勒布平日悉心撫馭不許互相欺壓爭競以便秉公調處仍責令噶布倫等隨時訪察儻有第巴頭人及官弁兵役倚勢勒買苦累外

番卽稟駐藏大臣拏究一向來西藏遇有訟事係歸管理刑法頭人朗仔轄聽斷俱照夷例分別重輕罰以金銀牛羊減免完結恐有高下等弊見在告知達賴喇嘛及噶布倫等凡有關涉漢回外番等事均令朗仔轄呈報揀員會同審理一聶拉木濟隴絨轄三處均與巴勒布連界邇來販運日多巴勒布馱載貨物來藏貿易者第巴收稅加至十分之一易致爭執以後止准減半收取並令勒碑界所長遠遵循一西藏鹽斤於沙土中刨出本不潔淨應卽於挖出時交該處第巴查驗鹽斤成色酌中定價毋許故昂任意勒買一駐藏大臣衙門向挑官兵應役均無定額將徭以下從而效尤應酌定名數定期更換至駐藏大臣差遣官兵赴省製辦賞號之事有曠操防應咨明本省總督飭有司代辦遇便帶藏並飭禁兵丁雇役番婦以肅營伍一西藏噶布倫戴綱第巴等缺辦理

地方管束兵民均關緊要遇有缺出應於誠實勤安之子弟中慎選承充至第巴營官商卓特巴等不下二三百缺逐一奏補未免過繁應請將大處緊要地方缺出調驗補放其偏遠第巴等缺出仍令達賴喇嘛自行選擇一理藏事司員並駐藏遊擊尙未議給關防懇敕部鑄給辦理藏番事務章京關防一顆駐藏遊擊關防一顆俾辦事呼應較靈一宗喀濟隴聶拉木等處爲巴勒布往來門戶收稅行鹽等事均關緊要見在噶布倫等揀派第巴三人分頭安設又選老成能事裁紉駐紮脅噶爾地方統轄宗喀濟隴聶拉木三處就近稽查其缺較爲繁重請照阿哩第巴之例由部發給號紙以專責成一從前解赴打箭鑪口外兵餉皆係元寶迨後止解碎銀但自省至藏萬里崎嶇儻有碰失各站易於推卸況番地買賣交易均以元寶成色爲足請嗣後仍照舊以元寶起運一

西藏向有賞需一項係蒙 皇上軫念達木官兵素無錢糧將三十九族每年所交例馬銀三百九十餘兩買辦段布煙茶銀牌按年獎賞一次此外並無別款今既添設唐古特番兵按期操演經駐藏大臣親查自當照例獎賞請於川省閒款內加給銀五百兩飭辦段布煙茶銀牌等項備賞一口外至西藏一切事務向歸駐藏大臣管理其巴塘迪東土司地方歸川省將軍督提衙門就近管理至江卡乍了察木多並移駐後藏各營汛臺站統歸駐藏大臣總理其巴塘裏塘安設塘汛官兵就近歸阜和協副將兼轄一打箭鑪出口以至西藏向於文職內派委州縣丞倅武職內揀派遊擊都司守備千總分駐辦理均三年一次更換該文武等官員遠役三年往返將及四載向來期滿並無保題升轉之途嗣後請令駐藏大臣照金川營屯各員三年期滿出具考語奏明咨送本

省將軍督提考察保題倣照邊俸報滿之例一體升用其駐防官兵遇換班之期亦須選派妥幹以資防守得旨依議速行